



Ech krut allerdéngs eng Fro vum Deputéierte Reding, dee mech gefrot huet, ob mer da bei de Privatpersounen géifen datselwecht maachen. Neen, bei de Privatpersounen maache mer net datselwecht. Dat war haut an der Commission des Finances et du Budget, an der Cofibu, an et ass awer och eestëmmeg ugeholl ginn, dass dat bei de Privatpersounen net soll gemaach ginn. An dofir wollt ech lech dat communicéieren.

Ech hoffen, dass mer e grouse Support kréie fir dës Mesure, déi eis en conformité mam europäesche Recht setzt.

Merci, Här President.

► **Plusieurs voix.** - Très bien!

► **M. le Président.** - Merci och dem Här Gramagna.

Mir géifen dann zur Ofstëmmung iwwergoen.

Vote sur l'ensemble du projet de loi 6556 et dispense du second vote constitutionnel

De Vote ass lancéiert. Fir d'Éischt déi perséinlech Stëmmen. D'Procuratiounen. De Vote ass ofgeschloss.

De Projet de loi 6556 ass mat 55 Jo- a 5 Nee-Stëmmen ugeholl.

Ont voté oui: Mmes Diane Adehm, Sylvie Andrich-Duval, Nancy Arendt, MM. Emile Eicher, Félix Eischen, Luc Frieden, Léon Gloden, Jean-Marie Halsdorf, Mmes Martine Hansen, Françoise Hetto-Gaasch (par Mme Nancy Arendt), MM. Jean-Claude Juncker (par M. Marcel Oberweis), Aly Kaes, Marc Lies, Paul-Henri Meyers, Mme Octavie Modert, MM. Laurent Mosar, Marcel Oberweis, Gilles Roth, Marco Schank, Marc Spautz, Serge Wilmes, Claude Wiseler et Michel Wolter (par Mme Octavie Modert);

MM. Marc Angel, Frank Arndt (par M. Alex Bodry), Alex Bodry, Mmes Taina Bofferdin, Tess Burton, M. Yves Cruchten, Mme Claudia Dall'Agnol, MM. Mars Di Bartolomeo, Georges Engel, Franz Fayot, Claude Haagen, Mme Cécile Hemmen et M. Roger Negri;

MM. Guy Arendt, André Bauler, Gilles Baum, Mme Simone Beissel, M. Eugène Berger, Mme Anne Brasseur, M. Lex Delles, Mme Joëlle Elvinger, MM. Gusty Graas, Max Hahn, Alexander Krieps, Edy Mertens et Mme Lydie Polfer;

MM. Claude Adam, Henri Kox, Mmes Josée Lorsché, Viviane Loschetter, M. Roberto Traversini et Mme Christiane Wickler.

Ont voté non: MM. Gast Gibéryen, Fernand Kartheiser et Roy Reding;

MM. Justin Turpel et Serge Urbany.

Ass d'Chamber bereet, d'Dispens vum zweete verfassungsméisseg Vote ze ginn?

(Assentiment)

Merci. Dann ass dat esou décidéiert.

Ech si vum Här Finanzminister gefrot ginn, deem opgrond vun der Verschiebung am Ordre du jour an Zäitnout geréit, well en e wichtege Rendez-vous zu London den Owend nach huet, ob mer kéinten dee leschte Projet virzéien. An ech hu gemellt kritt, wéi wann dat méiglech wär.

Ech géif dann direkt dem Rapporteur, dem honorabelen Här Guy Arendt, d'Wuert ginn iwwert de Projet 6642, wou et ëm d'Besteuerung haaptsächlech och vum elektronische Commerce am Land, wou et déliivréiert gëtt, an net méi onbedéngt an deem Land, wou d'Résidence ass vun deene jeeweilege Firmen, geet. Den Här Arendt huet d'Wuert.

11. 6642 - Projet de loi

- portant transposition de l'article 5 de la directive 2008/8/CE du Conseil du 12 février 2008 modifiant la directive 2006/112/CE en ce qui concerne le lieu des prestations de services;

- modifiant la loi modifiée du 12 février 1979 concernant la taxe sur la valeur ajoutée

Rapport de la Commission des Finances et du Budget

► **M. Guy Arendt (DP), rapporteur.** - Merci, Här President. Dir Dammen an Dir Härren, léif Kollegeen, dësse Projet de loi, iwwert dee mer de Mëtteg schwätzen, ass de 6. Januar vun dësem Joer vum aktuelle Finanzminister déposéiert ginn. Et geet dobäi ëm d'Ëmsetzen an déi national Legislatioun vum Artikel 5 vun der Direktiv 2008/8/CE vum Conseil vum 12. Februar 2008, déi d'Direktiv 2006/112/CE iwwert d'Plaz vun der Leeschtung vun Déngschter - „lieu des prestations de services“ - modifiéiert.

Mir schwätzen also hei iwwert de sougenannten „Lieu des prestations de services“ a folglech iwwert d'TVA, déi op verschiddene vun dëse Servicer ufällt. D'Aarbechterkummer huet hiren Avis zum Gesetzesprojet de 6. Februar 2014 erausginn. Dem Statsrot säin Avis datéiert vum 25. März 2014. Den 22. Abrëll huet d'Cofibu dësen Avis analyséiert, ier se den 29. Abrëll de schréftleche Rapport ugeholl huet.

Här President, ech wëll op dëser Plaz fir d'Éischt den Objet vum Gesetzesprojet erklären. Dës Explikatioun sinn zwar zum Deel technescher Natur, mä sinn onerlässlech, fir dësem Projet a senge Répercussiounen op eist Land Rechnung ze droen.

Den Artikel 5 vun der europäescher Direktiv modifizéiert ab dem 1. Januar 2015 d'Regelen, wat d'Plaz vun der Leeschtung vun Déngschter an der Telekommunikatioun, an der Radiodiffusioun a vu Servicer, déi iwwert den elektronesche Wee ofgewéckelt ginn, ugeet. Et handelt sech hei ëm d'Regele vun der Besteuerung vu Servicer vu steierpflichtegen Entitéiten, déi an der Europäescher Unioun etabléiert sinn, déi un net steierpflichteg Persounen, déi ebenfalls an der Europäescher Unioun etabléiert sinn, ginn.

D'Fro, déi sech stellt, ass fir ze wëssen, wou dës Servicer besteierbar sinn, ob dat an deem Land ass, wou den Ubidder vum Service etabléiert ass, oder an deem Land, wou den Empfänger vum Service etabléiert ass.

Fir op de Punkt ze kommen: Et geet haut de Mëtteg hei ëm déi faméis Recetten aus der TVA vum Commerce électronique, och nach E-Commerce genannt. Eben déi Steierrecetten, déi eistem Stat zeguttkommen, wa Firmen, déi hei am Land etabléiert sinn, Servicer ofwéckelen, vun deene Konsumenten an anere Länner profitéieren. Bis elo waren dës Servicer an deem Land besteierbar, wou den Ubidder sech niddergelooss huet. An anere Wierder: De Service war imposabel um sougenannten „Lieu d'établissement“ vum Prestataire.

De modifizéierten Text gesäit elo vir, dass d'Plaz, wou esou Servicer getäteg ginn, also och besteierbar sinn, déi Plaz ass, wou déi net steierpflichteg Persoun, also den Endkonsument, entweder etabléiert ass oder wou se hire Wunnsätz huet oder wou se gewéinlech wunnt. D'TVA ass also op där Plaz oder an deem Land fälleg, wou den Empfänger, dat heescht den Endclient säi Sätz huet oder wunnt.

Fir lech e Beispill ze ginn: Loosse mer e spuenesche Bierger huelen, deem och a Spuenien wunnt, deem nom 1. Januar 2015 eng Commande bei engem E-Commerce-Händler, deem zu Lëtzebuerg etabléiert ass, opgëtt, fir Servicer ze kafen oder fir Objeten ze kafen, da gëtt dës Service net méi hei zu Lëtzebuerg besteiert, mä dee Moment zum gréissten Deel a Spuenien. Wat och bedeit, dass een Deel vun den TVA-Recetten, déi de Lëtzeburger Stat bis elo agezunn huet, an Zukunft ewechfale wäert. An dësem Sënn schwätzen ech elo geschwënn iwwert déi faméis Perte vun de Recetten am Kader vun der TVA aus dem Commerce électronique.

Ier ech awer dorop kommen, muss ech nach op eng aner Thematik ze schwätze kommen, déi d'Betriber ugeet, déi esou Servicer ofwéckelen. Ab 2015 kënn nämlech och nach eng Ännerung fir d'Betriber, déi a verschiddene Memberstaten Aktivitéiten hunn, ouni awer do etabléiert ze sinn. Dës Betriber hunn elo d'Méiglechkeet, fir sech an engem bestëmmte Land identifizéieren ze loossen, an deem se dann och besteiert ginn. Si hunn dann een eenzege Kontaktpunkt, wou si hir periodesch Deklaratiounen an där Hisiicht ofginn. Dës Regime lehnt sech un deen un, deem elo scho fir Betriber virgesinn ass, déi sech ausserhalb der EU etabléiert hunn an awer Aktivitéiten a verschiddene Memberstaten iwwert den elektronische Wee ofwéckelen.

Dobäi kënn och, dass de Regime vun der Pflichtdeklaratioun ofzeleeën EU-wäit harmoniséiert gëtt. An anere Wierder: De Gesetzesprojet vun haut de Mëtteg huet och zum Zil, den allgemenge legale Kader ze setzen, wat déi steierpflichteg Etablissementer ugeet. Et sinn dann d'EU-Reglementer, déi de Fonctionnement vun dësem Regime a praktescher Hisiicht assuréieren. Well déi genannten Ännerungen awer e groussen Impact op d'Statsfinanze vu verschiddene Länner hunn, huet d'Direktiv déi finanziell Auswierkunge vun dësem Gesetzesprojet op véier Joer étaléiert.

Wann eng Entreprise sech elo an engem EU-Land identifizéiert an dann iwwert de Guichet unique fiert, deem zu Lëtzebuerg och nach „mini one-stop shop“ genannt gëtt, da kann dëst Land d'Steierrecetten aus dem Commerce électronique 2015 an 2016 zu 30% behalen, an de Joren 2017 an 2018 nach 15%, ier dësen Undeel 2019 dann op null erofgeet. Dofir muss een och ëmmer dës véier Joer a Betruecht zéien, wann een de Steierausfall vun dësem Gesetzesprojet bemoosse wëllt.

Fir op mäi Beispill zrëckzekomme vum Spuenier, deem Achate gemaach huet, dee gëtt dann no dem 1. Januar 2015 nach zu 30% zu Lëtzebuerg besteiert. Dat heescht, 30% vun de Recettë bleiwen hei, soudass déi Perte vun der TVA fir eise Stat net direkt op null fält, mä an Etappen iwwer véier Joer verdeelt ass. An da wäere mer scho beim sprangende Punkt: eise Budget. Dësen Text bréngt grouss Auswierkungen op déi finanziell Situatioun vun eistem Stat mat sech.

Ech wëll an deem Kontext drop hiweisen, dass d'Administration de l'Enregistrement et des Domaines den 9. Abrëll am Kader vun den Diskussiounen zum Budgetgesetz vun 2014 der Kommissioun eng Note presentéiert huet. An där Note ginn déi aktuellsten Zeenarien ermëttelt, wat d'Ewechfale vun de Steierrecetten duerch den elektronische Commerce ugeet.

Opgrond vun dëse Berechnunge wäert déi Ännerung, déi ech lech elo grad erkläert hunn, zu enger Perte bei de Statsrecettë féieren, déi sech op 628 Milliounen Euro fir 2015, 737 Milliounen Euro fir 2016, 1 Milliard 8 Milliounen fir 2017 an 1.153 Milliounen fir d'Joer 2018 belafen.

Fir dës Zuelen elo an de Verglach mat de Budgetszuelen ze setzen, kommen ech kuerz op de Budgetsrapport fir d'Joer 2014 zrëck. D'Previsioun vum Solde an der Administration centrale belaf sech do op minus 723,7 Milliounen fir 2013. De Budget fir d'Joer 2013, deem hei am Haus gestëmmt ginn ass, huet en Defizit vu minus 1 Milliard 41 Milliounen virgesinn. D'Plus-value u Recetten an der Héicht vu 423 Milliounen Euro ass d'Ursach fir dës Verbesserung vun 317,6 Milliounen Euro, mä dës Verbesserung ass bal exklusiv op déi héich Recettë vun der TVA um Commerce électronique zrëckzuféieren.

D'Cofibu huet nach an hirem Budgetsrapport notéiert, dass d'Recettë vun der TVA um Commerce électronique op eng Manéier explozéiert sinn zu engem Zäitpunkt, wou aner Recettë stabil bliwwen oder souguer zrëckgaange sinn. Och ass do ze liesen, dass ee sech misst virun Aen halen, dass eis Aart a Weis, fir mat de Statsfinanzen déi lescht Joren ëmzegoen, fundamental geännert muss ginn, wann ee sech d'Changementer, wat d'TVA um Commerce électronique ugeet, ukuckt a wann ee weess, dass d'Steierrecetten um Bensin an um Tubak wahrscheinlech net eropgoe wäerten.

Aus der leschter Note vum Comité de prévision fir d'Joren 2014 bis 2018, déi den 9. Abrëll an der Kommissioun virgestallt gouf, geet dat och nach eng Kéier ervir. Et gëtt virgerechent, dass, wa sech näischt ännert, eis Bruttostatsschold bei 16 Milliarden 344 Milliounen Euro am Joer 2018 läit. Dat sinn ongeféier 26,6% vun eistem PIB. D'Intérëten, déi der Administration publique doduerch ufalen, belaf sech dann op ëm déi 330 Milliounen Euro.

Et ass richtig, dass et net einfach ass, genau virauszegesinn, wéi grouss elo d'Recetten aus dem Commerce électronique iwwert déi nächst Jore si wäerten. Och well dat dovunner ofhänkt, wéi vill Entreprises, déi elo zu Lëtzebuerg etabléiert sinn, iwwert de Guichet unique zu Lëtzebuerg fuere wäerten a wéi vill sech der an aner Länner identifizéiere ginn. Wat een awer soe kann, ass, dass dës Direktiv, iwwert déi mer de Mëtteg schwätzen, schonn den 20. Februar 2008 publizéiert gouf an een dat vu Lëtzeburger Säit net ganz proaktiv ugaangen ass.

Et gëtt awer och nach en aneren Aspekt bei dësem Gesetzesprojet, well verschidden technesch Dispositiounen am TVA-Gesetz ugepasst ginn. Et geet dobäi och ëm eng Recommandatioun vun der Médiateure zum Reklamatiouns-délai. Laut Artikel 76 vum kodifizéierten TVA-Gesetz vum 12. Februar 1979 kënnen Berichtgebungsbulletinen oder Bericht zur Taxation d'office iwwert de Wee vun der Reklamatioun attackéiert ginn. Eng Reklamatioun muss an deem Fall awer onbedéngt bannent dräi Méint ab dem Datum vun der Bekanntmaachung vum Bulletin eragereecht ginn. Et kann awer virkommen, dass en Assujetti ze spët drun ass, ouni dass dat säi Feeler wier, an dass en net méi déi Méiglechkeet hätt, fir eng Reklamatioun anzerechen.

Et ass esou ee Fall, deem d'Médiateure dozou gefouert huet, eng Recommandatioun ze maachen. Et ass virgeschloe ginn, fir dës Situation entgéintzewirken, dass d'Onméiglechkeet, fir eng Reklamatioun eranzerechen, op Nofro opgehuewe gëtt, ënnert de Bedéngungen, dass dës Demande bannent 15 Deeg vun deem Moment un, wou den Assujetti erëm vu sech selwer an der Lag ass, eng Reklamatioun ze maachen, gestallt gëtt an dass dës Demande net méi spët wéi sechs Méint nom Oflafe vum initiale Reklamatiouns-délai gemaach gëtt.

Well dëst eng aussergewéinlech Moossnam ass, muss den Assujetti bewisen, dass et him onméiglech war, den initialen Délai ze respektéieren.

ren. Dës Prozedur kann nämlech net dozou féieren, dass se mëssbraucht gëtt, fir de Reklamatiouns-délai ze ëmgoen. Et soll och vermide ginn, dass den Assujetti sech hannert senge Verrieder verstoppt.

Här President, ech mengen, mir sinn eis heibannen all bewosst, wat fir gewaltig finanziell Répercussiounen duerch dës Gesetzestext op eis duerkommen. An ech mengen och, dass mer eis all eens sinn, dass mer esou en externe Schock wéi dësen nëmmen offidere kënnen, wann eist Land déi néideg strukturell Reformen an Ugrëff hält.

Ech wëllt op dëser Plaz nach dem Finanzminister Merci soe fir déi gutt a schnell Zesummenaarbecht mat der Chamber. An, dat gesot, mat der Hoffnung, dass d'Chamber dësem Gesetzesprojet hir breet Zoustëmmung ausschwätzt, bréngen ech heimadder och den Accord vun der DP-Fraktioun zum virleienden Text.

Ech soe Merci fir d'Nolauschteren.

► **Plusieurs voix.** - Très bien!

► **M. le Président.** - Merci dem Här Arendt. Eischten ageschriwwene Riedner ass den Här Gilles Roth vun der CSV.

Discussion générale

► **M. Gilles Roth (CSV).** - Merci, Här President. Ech soen dann och vun dëser Plaz aus dem Rapporteur, dem Guy Arendt, Merci fir säi gudden an och prezise schréftlechen a mëndleche Rapport.

Ech kann och den Här Bodry berouegen, dës Gesetzesprojet, deem ass agereecht gi vun dem neie Finanzminister, dem Här Gramagna, an d'CSV - dat Wichtegst virop - wäert dës Gesetzesprojet stëmmen. Well mir maache selbstverständlech eist Ofstëmmungsverhalen net ofhängeg vu wat fir enger Regierung de Projet de loi kënn, mä mir maachen dat ofhängeg vun dem Inhalt.

(Interruptions)

An de Rapporteur, Här Bodry, deem huet dat och schonns duergestallt: Dësse Projet de loi ass, vun der Schreifweis hier, ee ganz technesch Gesetzesprojet. Well et ass eigentlech d'Ëmsetzung vun enger Direktiv, déi effektiv schonn op d'Joer 2008 zrëckgeet. Mä et si virun allem déi finanziell Implikatiounen, déi dësse Projet huet fir eist Land, déi, mengen ech, haut och mussen den Objet vun eisen Diskussiounen sinn.

Mir haten d'Chance eigentlech zu Lëtzebuerg, dass bis elo am Kontext vum sougenannten „elektronischen“ Handel d'TVA konnt erhuewe ginn an deem Land, wou de Prestataire de service, dat heescht deejéinegen, deem déi Internetleschtungen ugebueden huet, wou deem etabléiert war, dat war an der Regel hei zu Lëtzebuerg. An dat onofhängeg vun dem Land, wou d'Clientë gewunnt hunn. Elo wäert awer mat dëser Direktiv dee System ëmgedréit ginn. Nämlech wäert net d'TVA mussen erhuewe ginn an deem Land, wou den Ubidder säi Sätz huet, mä do, wou den Endclient wunnt.

Mir hunn awer eng Chance, dat ass nämlech déi, dass an der Regel déi Ubidder am elektronischen Handel a ganz villen Häre Länner operationell sinn, an dat besonnesch och an eenzelnen europäesche Memberstaten. An am Sënn vun enger administrativer Vereinfachung besteet duerfir d'Méiglechkeet, fir e sougenannten „Guichet unique“ opzestellen, wou dann den Internetubidder usäseg ass. Dee kollektéiert zwar d'TVA vun de Länner mat deem Taux, wou hir Clientë setzen, mä mir hunn d'Chance, dass mer kënnen während de Joren 2015 an 2016 dovunner 30% zu Lëtzebuerg halen. 2017 an 2018 kënnen mer dovunner nach 15% halen.

De Guy Arendt huet higewisen op, mengen ech, d'Fiche financière, déi an dem Gesetzesprojet bäigeluucht ass a wou och d'Verrieder vun der Enregistramentsadministratioun eis erkläert hunn, dass, jee nodeem, wéi vill Ubidder hei zu Lëtzebuerg wäerten hire Guichet unique behalen, de Steierausfall um Niveau vun der TVA sech wäert bewegen zwësche 600 Milliounen Euro, wann all d'Ubidders, déi de Moment hei etabléiert sinn, hire Guichet unique zu Lëtzebuerg opstellen, bis zu enger Milliard, wann, par impossible, géifen alleguerten dës Ubidders d'Land verlossen.

D'Realitéit wäert zimlech no bei deene 600 bis 700 Milliounen Euro sinn, well déi Ubidders awer nient dem steierlechen Ëmfeld och virun allem déi Kommunikatiounsinfrastrukturen, déi mer zu Lëtzebuerg hunn an déi iwwert déi lescht Joren opgeluecht goufen, wäerten dervu profitéieren.



Wat ass dann elo de Steierausfall? Mä zënter 2003 huet eist Land iwwert de Wee vun dem Commerce électronique, also dem elektronischen Handel, ronn 4,3 Milliarden TVA-Einnahme kritt. Dës Suen, déi sinn eigentlech direkt oder indirekt iwwert déi lescht zéng Joer an eis Ekonomie agefloss. An eleng tëschent 2011 an 2013 hu sech déi TVA-Einnahme verduebelt, nämlech 2011 louch se nach bei 569 Milliounen, 2013 bei 952 Milliounen. Fir dëst Joer, wann d'Schätzunge vun der Enregistrementsverwaltung sech als richteg erweisen, wäerte mer de Kapp vun enger Milliard Euro TVA-Einnahmen dépasséieren.

Et muss ee sech eigentlech an de Verglach setzen zu den Ausgaben, déi de Stat bewerkestellt. Mir kéinte mat där Milliard Euro, déi iwwert den elektronischen Handel erakënn, sämtlech Familljenzoulagen, déi an engem Joer ufalen - sämtlech Familljenzoulagen, net nëmmen d'Kannergeld -, finanzéieren. Mir kéinten och mat dem elektronischen Handel ronn zwee Drëttel vun den Investitiounsangaben, déi de Stat an de leschte Jore gemaach huet, direkt finanzéieren.

An ech soen och hei nach eng Kéier ganz kloer an däitlech, dass déi Fro, déi diskutéiert war, nämlech: Hätt d'Regierung net missen déi Suen, déi aus dem elektronischen Handel iwwert déi lescht Joren opgelaf sinn, an e Reservefong setzen?

Do soen ech nach eng Kéier, dass d'CSV zu där Politik steet, dass an de Krisejoren, 2008 bis 2013, déi ronn 3,3 Milliarden, déi während där Zäit um Niveau vun dem elektronischen Handel als TVAs-Einnahmen opgehuewe goufen, dass déi net ewechgestallt goufen, mä dass déi an d'Ekonomie agefloss sinn. Domadder hunn nämlech ganz vill Betriber am Handel an am Handwierk direkt oder indirekt Opträg kritt. Et sinn och Aarbechtsplazen doduerch erhale ginn.

An déi antizyklesch Politik, déi huet och hir Friichte gedroen. Well trotz deem Konjunkturpak an deene Spuermooßnamen, mengen ech, muss een awer där fréierer CSV/LSAP-Regierung zeguthalen, dass, ouni dass et zu sozialen Onroue komm ass, een Null-Defizit op den 31. Dezember 2013 bei de gesamtëffentleche Finanzen erauskomm ass.

Nu soe mer als CSV och ganz kloer, dass dee geschate Steierausfall, dee sech jo net nëmmen op 2015, mä 2016 an doriwwer eraus wäert erweisen, duerch déi Perte un den TVAs-Einnahmen an dem elektronischen Handel, dass ee sech net soll der Illusioun präisginn, dass een déi eleng duerch Aspuermooßnamen, duerch „zero-based budgeting“ oder aner Konsumausgaben aspuere kann, decke kann. An duerfir soe mer och als CSV, dass een net derlaascht kënn, fir dee Steierausfall och duerch Steiererhéijungen auszegläichen.

A mir widderhuelen nach eng Kéier, Här Finanzminister, Dir Dammen an Dir Härren, dass d'CSV och an der Opposition zu där Propos, déi se virun de Wahle gemaach huet, nämlech, fir de Regelsaz vun der TVA vu 15 op 17% an d'Luucht ze setzen, dass mir dozou stinn. Well dëst eleng därft zu Mehreinnahmen um Niveau vun der TVA, also d'Erhéijung vun dem Regelsaz vu 15 op 17% vu geschaten 320 Milliounen Euro pro Joer féieren.

Mir soen awer gradesou däitlech, dass mer déi annoncéiert Erhéijung vun der TVA um Logement locatif, also an dem Mietwunnungsberäich, dass mer déi kontraproduktiv fannen, fir de Steierausfall auszegläichen. Well dës Moossnam, an den Här Reding huet dat virdrun am Kontext vun deem anere Projet de loi gesot, déi wäert derzou féieren, dass d'Offer u Mietwunnengen, dass déi net wäert der Demande, déi stets steigend ass, entgéintwierken. An et wäerte virun allem Famillje mat mëttlerem a mat niddregem Akommes, Elengerzéier sinn, déi hei vill méi Schwierigkeete wäerte kréien, fir sech op dem Mietwunnungsbau eng Wunnrecht kënnen ze leeschten.

An et si jo eng ganz Rei vu Kommunalpolitiker, géif ech soen och zerguttst an der Chamber, mä d'Baubranche, déi huet dee Message, dee vun der Regierung komm ass, scho längst opgeholl. A wann Der gesitt, dass an der Regel bis elo eigentlech déi Wunnechten, déi traditionell vu Privatleit dem Mietwunnungsbau zougefouert goufen - wat war dat? oder wat ass dat? -, mä dat sinn Appartementer vun enger Gréisst vun 80 bis 85 Meter carré.

Et ass awer elo esou, dass d'Baubranche a virun allem d'Promoteure fir déi Projeten, déi nach net ganz duerch d'Prozedur sinn, an dat soe si och, dass déi eigentlech vun deenen traditionellen Standardappartementer ofrécken, fir op

méi grouss Appartementer ze goen, mat enger Contenance vun 110 bis 120 Meter carré, déi dann net méi dem Mietwunnungsbau zougefouert ginn, mä als Eegewunnengen am Kontext vun Appartementer solle geschaf ginn.

Elo ass et awer esou, dass bei engem Meter-carrés-Präis, dee bei 5.000 bis opwäerts ronderëm d'Stad ass, an der Stad vill méi héich ass, dass do ganz vill Famillje sech iwwerhaupt keng Eegewunnung an där Gréisst a mat deem Präis kënnen leeschten. An duerfir soen ech hei ganz kloer am Numm vun der CSV-Fraktioun, dass mir d'Regierung opfuere, déi anonciéiert Hausse vun 3% op 17% an der TVA Logement locatif, fir déi net virzehuelen.

En zweete Punkt, Här President, ass och deen, dass mir eigentlech ëmmer gesinn, dass déi ugekënnegt TVA-Hausse, ob se sech elo op de Regelsaz beschränkt, an nach méi, wa se sech och an de Logement locatif beweegt, dass déi muss ausgeglaach ginn duerch eng sozial Offiederung um Niveau vun der allgemenger Steiertabell. Well et wäert nämlech soss d'Mëttelschicht sinn, déi d'Mëllechkou gëtt vun dëser Regierung, fir déi dote Finanzpolitik ze finanzéieren.

Madame Loschetter, ech ginn lech och e konkret Beispill. Bis elo ass et esou, an dat beleen OCDE-Studien, dass e Stot mat zwee Kanner bei eis am Land mat engem Akommes vu ronn 40.000 Euro, déi hunn... 99% vun hirem Bruttoakommes ass gläich Nettoakommes. Firwat? Well se zwar Sozialofgabe ginn, well se och Steiere bezuelen, net an engem héije Mooss, mä well se dat ausgeglaach kréien duerch Sozialtransferten, notament um Niveau vun dem Kannergeld an aner Vergëschtegungen, wat also mécht, dass mat engem Bruttoakommes vun engem Stot mat zwee Kanner vu 40.000 Euro, dass déi praktesch datselwecht als Netto hunn.

Wann een awer elo d'Akommes vun enger Famill kuckt mat dem faméise Saz vu ronn 83.600 Euro, wat eng normal gutt situéiert Famill ass, déi awer nach net räich ass, mat zwee Kanner, déi hunn awer de Problem, dass déi da scho bei enger Steierlaascht leie vun 39%. Rechent een do nach dozou d'Solidaritätssteier, dann ass fir déi Famill mat all 1.000 Euro, déi déi weider verdéngen, dat ass nach keng räich Famill, ginn déi ronn 430 Euro d'Joer um Niveau vu Steieren un de Stat of.

A mir sinn als CSV der Meenung, dass een deem Phenomen och vun der Mëttelschicht muss an enger Upassung vun der Steiertabell Rechnung droen. An duerfir, Här Finanzminister, froe mer lech eigentlech och, dass Der parallel zu där ugeduechter TVA-Erhéijung, déi jo zum Deel och dozou gefouert huet, nämlech fir den Ausfall vun der TVA um elektronischen Handel, dass Der déi an eng Offlaachung vun dem Mëttelstandsbockel vun der allgemenger Steiertabell afléisse loosst.

Ech wëll och do konkret soen, dass an der Deklaratioun zur Lag vun der Natioun, déi am Abrëll 2013 gemaach gouf ënnert där fréierer Regierung, scho recommandéiert gouf, am Numm iwwerengs vun där ganzer Regierung, fir ab dem 1. Januar 2015, recommandéiert gouf, well normalerweis d'Wahle jo a 14 Deeg gewiescht wieren, mä och do ass prezisiéiert ginn, dass een dat sollt abetten an eng sozial Offiederung notament vun deene Mëttelverdenger aus eiser Gesellschaft.

Här President, ech wëllt awer dann och am Numm vu menger Fraktioun nach eng Kéier insistéieren, dass d'CSV sécherlech net verlaangt, dass de Finanzminister eis haut oder an deenen nächsten zwee Méint Detailler iwwer eng sougenannten „Steierreform“ gëtt. Dat kann een net verlangen, nodeems Der sechs Méint am Amt sidd.

Ech soen awer gradesou däitlech, Här Minister, dass mer vun lech verlaangen, och am Sënn vun deem, wat oft ugekënnegt gëtt, nämlech - Wat wëlle mer? Wou wëlle mer higoen? Mir wëllen de Leit soen, wat op se duerkënn! -, dass Der awer zumindest eng Äntwert misst kënnen ginn op elementar Froen, nämlech: Gëtt bei lech de Spëtzsteiersaz erhéicht? Jo oder neen? Mat wat fir enge Mëttel gedentk Der de Mëttelstandsbockel ofzeflaachen? A wat sinn zumindest déi Mehreinnahmen, déi Der lech erwaart duerch eng Erhéijung vun der TVA op dem sougenannten „Logement locatif“?

Här President, ech kommen zum Schluss. Ech wëll awer nach zu deenen zwee Punkte kuerz Stellung huelen, wat reng prozedural Moossname sinn a wou de Guy Arendt och dovun Mentioen gemaach huet. Dat ass nämlech dee sougenannten „Relevé de forclusion“ oder „Relevé de déchéance“.

Mir sinn als CSV d'accord, dass deen an dësem Gesetzesprojet säin Néierschlag fénnit, fir dass eng Persoun, déi an der Regel dräi Méint Zäit huet, fir géint en TVA-Bescheid ze reklaméieren, wann déi duerch Ëmstänn, déi onofhän-

geg si vun hirem Wëllen, zum Beispill wa se krank ass, oder se huet hire Steierbescheid, aus wéleche Grënn och ëmmer, net direkt kritt, dass se da ka froen, fir vun där Déchéance, dat heescht, fir dass se entbonne ka ginn, fir an där Frist vun dräi Méint ze reklaméieren. Domadder si mer als CSV ausdrécklech d'accord.

Mir hunn awer eis Schwierigkeete mat där Recommandatioun, déi d'Médiature gemaach huet am Kontext vun hirem Bericht, nämlech déi vun der sougenannter „Remise gracieuse“. Em wat geet et?

Bei den direkte Steieren, do huet een d'Méiglechkeet, wann eng Steier eigentlech aus objektive Grënn inéquitabel wier, oder subjektiv Elementer, zum Beispill wann eng Persoun praktesch keng Sue méi huet, fir Steieren ze bezuelen, da ka se bei dem Steierdirekter eng sougenannten „Remise gracieuse“ froen, a géint dee Bescheid vun dem Steierdirekter par rapport zu där Reklamatioun ass souguer e Recours beim Verwaltungsgericht méiglech.

Mir sinn awer als CSV der Meenung, dass dës Prozedur de Remise gracieuse, déi dëst Recht, an Däitschland gëtt et dat, dass déi net ubruecht ass um Niveau vun der TVA. An dat aus engem ganz einfache Grond, well et en Ennerscheid gëtt tëschent der TVA, wat eng Konsumsteuer ass, déi eigentlech de Commerçant ab initio kollektéiert, net fir sech selwer, mä fir de Stat, an enger direkter Steier, déi opgrond vun engem erwirtschaftete Gehalt oder engem erwirtschaftete Benefiss befaasst (veuillez lire: erfüllt).

Aus deene Grënn, Här President, si mer als CSV à ce stade net d'accord, fir eng sougenannten „Remise gracieuse“ um Niveau vun der TVA anzeféieren. Net als Härtefall géintwuer de Leit, déi Schwierigkeeten hätten, fir d'TVA ofzeféieren, mä ganz einfach opgrond vun der spezifischer Natur vun der TVA als Konsumsteuer.

Dat gesot, Här President, an no deem e bësse méi laangen Exkurs, ginn ech selbstverständlech d'Zoustëmmung vun der CSV-Fraktioun zu dësem Gesetzesprojet an ech soen lech Merci fir d'Nolaaschten.

► **Plusieurs voix.** - Très bien!

► **M. le Président.** - Merci och dem Här Roth. Als Nächsten huet den Eugène Berger vun der DP d'Wuert.

► **M. Eugène Berger (DP).** - Merci, Här President. Léif Kolleeginnen a Kollegen, ech wëllt och direkt dem Rapporteur Merci soe fir säi schrëfflechen a mündleche Bericht. Hien huet och schonn den Accord vu menger Fraktioun ginn. Ech wëll mech op e puer Remarqué beschränken.

Effektiv kéint ee soen, dass et hei einfach ëm Ëmsetzung vun enger EU-Direktiv geet vun 2008 am Beräich vun der TVA, mä ech mengen, mir sinn eis jo all bewosst, dass hei awer an där Ëmsetzung vun där Direktiv en enorme politesche Sprengstoff dran ass, deen eis Budgetpolitik an der Vergaangenheet, mä och an Zukunft wäert nach nohalteg markéieren.

Virun allem ass et jo esou, dass d'Ëmsetze vun där Direktiv d'Ewechfale vu ganz grouse Recettë bedeit. Ech hat dat och scho beim Budget erläutert. Et ware Kontroversen zu den Zuelen, wéi vill géif ewechfalen, ënner anerem d'Chambre des Fonctionnaires publics an och d'CGFP huet gemengt, dat wier alles net esou schlëmm. Mä an der Finanzkommission hate mer awer d'Zuelen nach eng Kéier kritt, detailléiert Informatiounen vum Direkter vun der Enregistrementsverwaltung, dee jo och, ech wëll dat nach eng Kéier zitieren, gesot huet zu den Zuele vun der CGFP: „rien n'est moins vrai“. Fir einfach ze soen, dass dat Zuele sinn, déi net Kapp a Fouss hunn.

vläicht ganz kuerz, fir se nach eng Kéier ze widerhuelen, se si scho gesot ginn. Wann elo, an engem Scénario moyen hate mer dat, ech huelen hei einfach déi Zuelen, déi ech am Budgetsrapport hat, wat do genannt ginn ass „un scénario mécanique“, wou een dovun ausget, dass, wann elo net déi Direktiv komm wier, mer an der Moyenne eng Milliard Recetten hätten, da verléiere mer 2015, hu mer eng Perte économique vu 627 Milliounen, dann dat Joer drop 737 Milliounen Euro, 2017 eng Milliard Euro, 2018 1,1 Milliarden Euro als Perte économique, fir einfach ze ënnersträichen, wat fir eng Zommen eis do wäerten am Budget an den nächste Jore feelen.

Wat ech wëll soen, dat ass, dass et awer laang gewosst war - déi Direktiv ass vun 2008 -, dass dat hei eng Kéier géif op d'Land zoukommen, dass mer eng Kéier domadder konfrontéiert géife ginn. An dat awer an all deene Jore keen Zeenario ausgeschafft ginn ass, kee Plang B, keng Alternativ ausgeschafft ginn ass, fir deem entgéintzewierke bis praktesch op dat Joer, wou et da kënn, wou een da mat der Nues virun der Mauer steet.

Et ass net eréischt säit 2008, mä ech hunn dat nach eng Kéier nogekuckt, den Här Roth hat als Budgetsrapporteur 2011 och drop higewisen. 2011, dat sinn also och scho bal dräi Joer, iwwer dräi Joer hier, wou och den Här Roth, e kann et selwer eng Kéier noliesen, gesot huet, opmierksam gemaach huet, passt op, mer mussen kucken, dass mer hei eng, ech soen emol eng Sortie de secours weinstens fannen, oder dass mer eis mat Zäit iwwerleeën, wéi mer där Perte vun deenen enorme Recettë kéinten entgéintwierken. An deene Joren 2012, 2013 respektiv och 2011 schonn ass awer do näischt geschitt. An dat ass jo ee vun deene groussen Défien, déi dann déi nei Majoritéit huet, fir müssen ze kucken, fir mat där Situatioun dann eens ze ginn.

Den Här Roth huet virdrun erkläert, dass awer effektiv déi Sue benotzt gi sinn, fir antizyklesch Krisepolitik ze maachen. Dat stëmmt net an deem Mooss, Här President, muss ech awer trotzdeem dem Här Roth soen. An ech wëllt och verweisen op eng Rei Avisen, déi och beim Budgetsrapport zitiéiert gi sinn.

Zum Beispill de Statsrot, dee gesot huet, et ass jo net nëmmen, dass ee versicht huet, do d'Effete vun der Kris domadder ofzefiedere, fir weider ze investéieren, fir dat den Entrepreneuren zeguttkommen ze loosse, mä et sinn ëmmer méi nei zousätzlech Dépense kreéiert ginn - Stéchwuert Studentesubsiden, Chèques-services an esou weider -, wou also mat deene Suen, wou mer woussten, se géifen eng Kéier ewechfalen, eigentlech awer nei Dépenses domadder ofgedeckt gi sinn.

Mir hunn eigentlech lafend Dépense mat deem, ech nennen et emol einfach Jackpot do, wou mer woussten, dass deen eng Kéier géif auslafen, hu mer domadder bezuelt, amplatz vläicht sech méi fréi Gedanken ze maachen, wéi kënnen mer déi Suen, net alleguerten, mä en Deel weinstens, op d'Säit leeën - „Fonds souverain“ ass dat Stéchwuert, dat ëmmer erëmmkomm ass -, fir dass mer deem hätte kënnen entgéintwierken. Wéi gesot, et ass net mat Zäit reagiert ginn, an duerfir hu mer also elo déi grouse Erausforderunge fir déi nei Majoritéit, fir deem entgéintzewierken.

Effektiv eng vun de Solutiounen, et ass awer net déi, déi alles kann ofdecken, dat ass déi vun der TVA-Erhéijung, déi wäert d'nächst Joer kommen. Nach muss een erklären, oder ëmmer erëm rappeléieren, dass mer den niddregsten Taux an Europa wäerten hunn.

An dann awer och e Wuert zu der TVA-Erhéijung, den Taux réduit bei den Zweet-, Drëtt-, Véiert- Fënnestwunnengen. Et ass esou, dass elo dobasse gesot gëtt, dass dat géif bedeuten, dass dann och insgesamt hei zu Lëtzebuerg géifen am Wunnungsbau Problemer kommen, well dann ënner anerem d'Loyere géifen an d'Luucht goen. Mir sinn der Meenung, dass dat net de Fall wäert sinn.

Well et kéint ee jo och ëmgedrëit froen: Deemoos, wéi deen Taux réduit agefouert ginn ass, sinn dann deemoos doduerjer, dass een deen Taux vun 3% agefouert huet, d'Loyeren zum Beispill erofgaang? Neen, guer net! Och deemoos, mat deenen 3%, sinn d'Loyere monter weidergaang. Wat mer brauchen, dat si méi Sozialwunnengen. Dat ass einfach méi eng grouss Offer um Marché, déi mer brauchen. Dat ass dat, wou ee muss usetzen.

An och si mer der Meenung, dass, wann een elo deen Taux réduit vun 3% aféiert, dass muss een awer och betounen, deen Taux vun 3% bleift fir déi Leit, déi selwer an hirt Haus wunne ginn. Dass mir also dat och als eng sozial selektiv Mesure gesinn, wou jo ganz vill ëmmer an deene vergaangene Joren dovunner geschwat ginn ass. Et sinn awer ganz selten, fir net ze soe bal ni Politike gemaach ginn, wou wierklech déi sozial Selektivitéit och ëmgesat ginn ass. Hei ass een Element, wou mer dat wäerte maachen.

An nach wie vor, wann ee kuckt, wéi de Lëtzeburger ass, wann en e puer Sou huet, e puer Euro gespuert huet, huet e grosso modo dräi Méiglechkeeten. Entweder e setzt se op eng Bank, wou awer net ganz vill Zënse dobäi erauskommen. E geet eventuell, ech soen emol, e spékuléiert mat Aktien. Oder déi drëtt Méiglechkeet, wat de Lëtzeburger nach ëmmer mécht, dass ass, dass en dann an Immobilier investéiert. Effektiv déi Leit, déi dann eventuell en Appartement kafen, fir dann dat ze verlounen, fir doduerjer e klengen zousätzlechen Invest ze hunn, herno eventuell och eppes fir hir Kanner ze hunn.

Ech sinn nach wie vor iwwerzeegt, dass, och, wann elo do den Taux vun 3% op 17% geet, widerhin d'Lëtzeburger wäerten och an den Immobilien investéieren, well se nach ëmmer wëssen, do kréien ech méi Suen, wéi wann ech d'Suen op der Bank loosse, och wann herno vläicht déi Marge bénéficiaire net méi gradesou héich ass, an dass doduerch och net müssen d'Loyeren an d'Luucht goen. An, en plus, hunn



ech och herno eng Valeur immobilière, déi och eppes wäert ass.

Duerfir géif ech soen, datt dat awer ënnert dem Stréch eng Reform ass, déi sozial selektiv ass an déi net wäert mat sech bréngen, datt doduerjer alles an de Koup fällt um Marché immobilier. Au contraire, mir muss kucken, datt mer méi Sozialwunnenge kréien, datt mer méi eng grouss Offer wäerten hunn.

E Wuert och zu deem, wat den Här Roth gefrot huet, d'Steierreform. Wat jo och ëmmer do interessant ass, wann elo eng Rei Froe gestallt gi fir eng Steuerreform, och do muss ech soen, datt den Här Roth - an d'CSV huet jo iwwer Joren, Jorzéngten de Finanzminister gestallt -, datt se do an der Vergaangenheet also schonn d'Chance gehat hätten, fir all déi Froen, déi se elo stellen, deemools selwer ze beäntwerten a selwer eng Steuerreform op de Wee ze bréngen.

Déi Regierung hei, déi huet sech virgeholl, fir op alle Fall an deenen nächsten zwee Joer dat auszuschaffen, fir all déi Froen dann och kucken ze beäntwerten, an datt een dann also do wirklech och e Package kritt, wou net nëmmen de Mëtzelstandsbockel, mä wou insgesamt eng sozial selektiv Steuerreform op d'Bee kennt, wou jiddweree gerecht behandelt gëtt.

Vläicht nach zwou Remarquen zum Ofschloss, Här President. Déi Fro, déi ee sech och hei muss stellen, dat ass: Wéi geet et weider mat deene verschiddene Gesellschaften, déi am E-Commerce tätég sinn? Dat kann een haut nach net beäntwerten, mä dat wäerte mer da spéitstens de Januar 2015 gesinn.

Et wier ze hoffen, datt do net ze vill Betriber da géifen hir Wallisse paken. Sécherlech hu se jo och nach eng Iwwergangszäit. Mä och do muss ee wëssen, datt also vläicht am Virfeld net genuch gemaach ginn ass, fir do och schonn, ech soen net Sorties de secours, mä aner Méiglechkeeten oder aner Produiten deenen Entrepreneuren ubidden, fir datt se vläicht méi laang géifen hei zu Lëtzebuerg bleiven.

Dat weist awer och méi generell drop hin, datt et ëmmer - wéi soll ech soen? -, ëmmer schwieereg ass, oder datt et net gesond ass, wann een op spezifeschen Nische setzt zu Lëtzebuerg, déi à durée déterminée sinn, wou ee weess, wou eng Rei Joren d'Suen erakommen an dann op eemol fort sinn. Dat ass eigentlech am Endeffekt keng nohalteg Politik.

Datt een also muss kucken, an Zukunft - dat sinn d'Léieren, déi een och da muss zéien -, an Zukunft méi ze diversifizéieren. Datt also och d'Regierung dat sech an hire Koalitionsaccord geschriwwen huet, datt een also net méi an Zukunft soll op spezifeschen Nischen, déi nëmmen zäitlech begrenzt sinn, dorobber setzen, domadder versicht, e puer Joer iwwert d'Ronnen ze kommen, an dann duerno virun engem Koup Schierbelen oder engem risego Biereg vu Scholde steet, mä datt een also muss kucken, iwwert d'Diversifikatioun och eis Recettelandchaft méi ze diversifizéieren. Wann also emol een Acteur oder eng Recette ewechfällt, datt een dann awer nach genuch anerer huet, déi do kënnen asprangen, also de Cocktail oder de Mix do muss richteg sinn.

Voilà, Här President, dat gesot, nach e puer Remarquen zu deem Projet, dee wéi gesot, natierlech och den Accord vun eiser Fraktioun fënnt. Merci.

► **M. le Président.** - Merci och dem Här Berger. Nächste Riedner ass den Här Alex Bodry vun der LSAP.

► **M. Alex Bodry (LSAP).** - Merci, Här President. Ech mengen, wann een dat hei ganz dréche kuckt, da kann ee soen, hei geet et ëm eng weider Ëmsetzung vun enger europäescher Direktiv. Mä ech mengen, de Rapporteur, de Guy Arendt, huet scho bei senger kompletter Presentatioun hei kloergemaach, dass et hei ëm eng Direktiv geet, déi en immensen Impakt wäert, an nohaltegen Impakt hunn op d'Lëtzebuerger Finanzsituatioun. Sou wéi eigentlech déi Texter virdrun, am ëmgekeierte Sënn, e formidablen Impakt op eis Finanz- an eis budgetär Situatioun, besonnesch och vum Stat haten a par ricochet och op d'Gemengen, well u sech d'Gemenge jo och deelweis mat 10% un den TVA-Einnahmen vum Stat drunhänken.

Déi Welt, déi sech lues a lues gemaach huet vun 2004 un, bis haut nach, déi wäert eng komplett aner ginn. Et wäert eng Ëmkéierung ginn eigentlech vun engem Prinzip vum Steuerrecht, dee bis elo an deem dote spezielle Beräich vum E-Commerce gegollt huet, wat d'TVA ugeet, a progressiv also komme mer an e ganz anere System eran. An dat, wat vun Honnerte Milliounen Euro iwwert déi lescht Joren an d'Statskeesen eragespullt ginn ass iwwer eenzel Betriber, déi sech weinst där doter steierlecher Landschaft hei zu Lëtzebuerg etabléiert hunn, dat wäert zu engem gudden Deel feelen an deenen nächste Joren.

Wann ech déi geschätzten Einnahme fir 2014 mat anzielen, déi jo bei eppes méi wéi enger Milliard Euro landen, TVA vum E-Commerce hei zu Lëtzebuerg, da kennt een, wann een dat ab 2003 rechent, kennt een op en Total vu ronn 5,4 Milliarden Euro, déi eleng also déi Branche vum E-Commerce iwwert d'TVA eigentlech an de Statsbudget bruecht huet.

Dat war sécherlech bis dato en Erfolleg vun enger gewëssener Nischepolitik, déi hei gemaach ginn ass. Et wäert sech elo erausstellen, ob dat och zu enger Nischekompetenz gefouert huet. Dat heescht, ob u sech déi Acteuren, déi sech eleng eigentlech weinst der TVA-Landschaft an dem Besteuerungssystem hei zu Lëtzebuerg etabléiert hu vun 2003 u bis haut, ob déi och weiderhin hir Aktivitéiten zu Lëtzebuerg aus wäerte steieren, och wann elo de Berechnungsmodus vun der TVA an Europa fundamental wäert änneren.

Wéi gesot, et ass keng Iwwerraschung, dass deen heiten Text kennt. Mech iwwerrascht e bëssen, dass et eigentlech esou laang gedauert huet, bis dass d'Regierung deen heite Projet deponéiert huet. Well dat war déi nei Regierung, déi deen heite Projet an der Chamber am Januar dëst Joer deponéiert huet. D'Direktiv geet ëmmerhin op de Februar 2008 zrëck. Dat sinn also, wann ech mech net iren, trotzdem praktesch sechs Joer, déi et gedauert huet, bis en Ëmsetzungstext vun der Regierung an der Chamber hei deponéiert ginn ass.

Mä egal wéi elo d'Regierung ausgesinn hätt zu deem Zäitpunkt, keng wär derlaanscht komm, matzäiten - virum 1. Januar 2015, wou déi nei Texter hei a Kraaft trieden -, fir deen heiten Text ze presentéieren, och wann en natierlech net esou angenehm ass wéi vläicht aner Texter, déi ee kann an der Chamber virbréngen.

Et ass evident, dass et zënter 2008 gewosst ass, dass mat der Échéance vum 1. Januar 2015 wäert op ee Schlag e gudden Deel vun TVA-Einnahmen dem Lëtzebuerger Stat feelen an dass dat sech wäert nach weiderentwéckelen iwwer en Zäitraum vu véier Joer, trapperchersweis mat Paliere vun zwee Joer, bis da schlussendlech net méi ganz vill wäert iwwereg bleiwe vun deem Kuch, dee sech gemaach huet an opgeblose ginn ass iwwert déi lescht Joren.

Et muss een och wëssen, dass et eng ganz kleng Zuel ass vu Betriber, déi eigentlech d'majeure Partie vun där doter TVA-Einnahmen ausmaachen. Et sinn haaptsächlech véier ganz grouss, déi sech hei zu Lëtzebuerg implantéiert hunn, déi de Gros vun deenen doten TVA-Einnahmen bis elo eragespillt hunn.

A wann een nëmmen d'Zuelen elo vun 2014 kuckt, wat jo dann nach Schätzung sinn, wou mir haut awer an der Finanzkommissioun gewuer si ginn, dass déi zoustänneg Steiervverwaltung dovunner ausgeet, dass plus ou moins kéinten awer och déi Einnahmen um Enn vun Joer effektiv erakommen, sou muss mer op där enger Säit déi geschätzten Einnahmen hu vun enger Milliard a 50 Milliounen Euro, an op där anerer d'brutto TVA-Recetten, déi geschätzt si ginn op 4,8 Milliarden Euro.

Also méi wéi ee Fënneftel, ee gudde Fënneftel vun eisen TVA-Recetten insgesamt gëtt am Joer 2014 duergestallt eleng nëmmen duerch dee relativ kleng Beräich, wat d'Zuel vun de Betriber an d'Zuel vun den Aarbechtsplazen ugeet vum E-Commerce, deen an e puer Joer hei opgebaut ginn ass a sech hei lues a lues instaléiert huet.

Nun huet sech hei nach eng kéier e bëssen déi Debatt widerholl, déi mir scho beim Budget haten. Wéi prévoyant ass déi viregt Regierung mat där doter Situatioun ëmgaangen? Ech mengen, et ass e bëssen esou, d'Wourecht - wéi esou oft - läit e bëssen tëschent deenen zwee.

Et ass evident, dass an den Zäite vun der akuter Kris, notament an de Joren 2009, 2010 an 2011, et sécherlech net de Moment war, fir ze soen: Elo huele mir nach eng Rei vun Honnerte Milliounen, déi mir ofzweigen, fir se iergendwéi op d'Säit ze leeën. Dat hätt bedeit, dass een eigentlech hätt misse bei enger ganz fragiler ökonomescher Situatioun a prekärer Finanzsituatioun an eng richteg Austeritéitspolitik oder an eng méi staark Verschëldung eragoe vum Lëtzebuerger Stat, wat sengerzäit kee wollt maachen.

Ech muss awer zougestoen - an do sinn et ëmmer Stëmmen ginn an alle Parteien, déi awer do virdru gewarnt hunn -, et hätt ee sécherlech kënnen drun denken, méi virsichteg ze sinn an de Joren 2012 an 2013, wou awer u sech net méi déi Krisituatioun an deem Mooss do war, fir do schonn en Apel fir den Duschtoprobéieren op d'Säit ze leeën.

D'viregt Regierung hat eng Rei vu Sanéierungspäck fir d'effentlech Finanzen geschnüürt. Si wollt net doriwwer erausgoen. Déi Aarbecht huet awer elo dës Regierung. Dat ass ganz evident. Dat ass eigentlech, géif ech soen, bal

dat Schwéierst, wat ze stemmen ass, well mir et hei jo och mat engem strukturelle Réckgang vun Einnahmen ze dinn hunn, also muss dës Regierung och mat strukturelle Moossnamen äntwerten op dee strukturelle Réckgang, deen hei geschitt.

Wat mech bis elo an der Debatt hei enttäuscht huet, dat ass eigentlech, dass och vusäit vun der gréisster Oppositionspartei, der CSV, elo hei erëm gefuer gëtt, wéi dat och scho bei de Budgetsdebatten war. Mir gi gewuer, wat se net wëllen. Also zimlech alles, wat net grad scho viru Jore vun hinne mat ënnerschrivwe ginn ass, dat fanne si iergendwéi schlecht. Mir ginn awer net gewuer - dat bleift e Geheimnis, wat se wohl hüten, ech weess net, bis wéini, vläicht bis zu den nächste Wahlen oder duerno -, wat si dann eigentlech wëllen.

Mä ech sinn awer elo ganz optimisteschen ginn - ech hu jo héieren elo an deem regelméissegem Kontakt mat der Press, dee se opgebaut hunn, dass se haaptsächlech wëllen op Alternative setzen, och wann d'Alternativen haut nach net vläicht do sinn -, dass mir awer sécherlech gewuer ginn an nächster Zäit - a wahrscheinlech esou schnell, wéi d'Regierung mat hiren Aarbechte kennt -, wat dann hir Alternative sinn,...

(Interruption)

...fir dat gemeinsam Zil ze erreechen, wou mir gesot hunn: Wa mir wëllen u sech eist mëttelfristeg Objektiv bei der Finanzplanung Enn vun dëser Period erreechen, da wësse mir, dass mir strukturell mussen den Équiliber vun eise Statsfinanze besonnesch ëm Honnerte Milliounen verbessern, sief et duerch Spuermoossnamen, sief et duerch Méieinnahmen.

An dann hätt ech gären déi Debatt Alternativ géint Alternativ, Projet géint Projet. Dat ass dat, mengen ech, wat och d'Leit dobauss verlaangen. Et geet net drëm, ëmmer nëmmen neen ze soen, et muss een och wirklech soen, duerch wat een dat wëllt ersetzen. A bis elo sinn éischter nëmme Virschléi komm vusäit vun der Opposition - a besonnesch och vun der CSV -, fir manner Suen ze spueren a respektiv also och den Équiliber éischter nach méi an den Déséquilibre ze drécken, wéi eng Verbesserung vun der Gesamtsituatioun vun den effentlechen Finanzen ze kréien.

Mä wat haut net komm ass...

► **M. Claude Wiseler (CSV).** - Fir fir d'Éischt eppes kënnen ze ersetzen, muss emol eng Proposition um Dësch leien.

(Interruption)

► **M. Alex Bodry (LSAP).** - Ah, Dir denkt net eegestänneg. Dir reagéiert just op Propositionen.

► **M. Claude Wiseler (CSV).** - Eng Alternativ, Här Bodry, wéi Dir gesot hutt, ass eppes wat ee mécht, wann een eng Proposition um Dësch leien huet. Et ass normal, datt d'Regierung Propositionen fir d'Éischt mécht.

(Interruption)

► **M. Alex Bodry (LSAP).** - Ma elo leie jo zum Beispill zur TVA Propositionen um Dësch. Bis elo hunn ech awer nëmmen héieren, wat net soll gemaach gi vun deem, wat proposéiert ass.

► **M. Claude Wiseler (CSV).** - Dir hutt virdru um Budget geschwat.

► **M. Alex Bodry (LSAP).** - An dann ass et, mengen ech, och gutt, dass mer dann nach vun der CSV héieren, wat si da bei der TVA amplaz géif maachen, fir en ähnlech finanziell Zil ze kréien. Dat ass, mengen ech, déi spannend Diskussioun,...

(Interruptions diverses)

► **M. le Président.** - Wann ech gelift!

► **M. Alex Bodry (LSAP).** - ...déi mir sécherlech nach wäerte kréie bei der Diskussioun ronderëm de Budget vun 2015. Ech mengen, do ka kee sech méi verstoppen, weder eng Regierung nach eng Opposition, an da kucke mir, wat dann do vu Konkretem bei där Diskussioun erauskënnt.

Ech mengen, mir sollten och hei net am Virfeld elo eng Diskussioun féieren iwwer eng Erhéijung vun der TVA; déi ass net Bestanddeel eigentlech vun deem heite Projet de loi. Selbstverständlech, mengen ech, huet d'Regierung do hir Verantwortung iwwerholl. Déi ass an de gréissere Linnen och net verschidde vun deem, wat ënnert der viregter Regierungskonstellatioun och diskutéiert ginn ass an ugedeit ginn ass, zumindest och a Pabeieren, déi op Bréissel geschéckt si ginn am Kader vum „Programme de stabilité et de croissance“. Mä et bleift, dass een déi Detaildiskussioun nach muss féieren.

Mir als LSAP-Fraktioun sinn net der Meinung, dass de Stat muss do sinn, fir privat Rendite bei Mietwunnengen ze finanzéieren. Dat ass e bëssen dee System, deen aner Leit schéngt virzeschwiwen. Dat gesi mir net als idéal Situatioun un.

(Brouhaha)

Et bleift awer, dass een deen dote Punkt muss kucken. Notament kann ech mir virstellen, dass déi Leit, déi sech elo zum Beispill engagéiert hunn an d'Décisioun geholl hunn, fir zum Beispill eng Wunneng ze kafen opgrond vun den alen TVA-Sätz, elo awer - well déi Projeten zwee, dräi Joer daueren, bis se ëmgesat ginn - dann en cours de route déi nächst Tranché géife mat engem méi héijen TVA-Saz beleuchten kréien.

Dat si jo zum Beispill Froen, déi ee muss diskutéieren, wann een iwwert déi nei TVA-Regelung schwätzt. Ech mengen, do soll een net zou si fir esou Diskussiounen. Mä nach menge mir, dass eigentlech dat, wat bái Wäitem an deene meeschten europäesche Länner üblech ass, dass reduziéiert TVA-Tauxen bei Wunnengen eigentlech nëmme fir soziale Wunnensbau gëllen, och net ka komplett falsch sinn hei zu Lëtzebuerg, et sief dann, hei géifen d'Auere ganz anescht dicke wéi an all deenen aneren europäesche Länner.

Ech wollt nach op eng Fro kommen, wat eigentlech deen zweeten Deel vun deem heite Gesetzestext ugeet. Dat ass net elo europäesch gemaach, mä dat ergëtt sech duerch eng Recommandatioun, déi eigentlech d'Médiateure gemaach huet. An do, mengen ech, si mir eis eens. Wann een den Här Roth hei héieren huet, well e mat gewëssener Fermetéit hei eng Positioun vun der CSV vertritt huet, hätt ee gemengt, do wären Divergenzen an der Finanzkommissioun gewiescht. Neen. D'Regierung an d'Finanzkommissioun hu gesot, dat, wat d'TVA ugeet, dass mer net wëllen op de System vun enger Remise gracieuse goen.

Dat ass also net eng Positioun eleng vun der CSV, mä déi - an dat ass aktenkundeg; et brauch een nëmmen de Rapport ze liesen - ass eng gemeinsam gedeelte Positioun. Wéi mer eis awer gemeinsam och géeneegt hunn, dass dee System vun der Déchéance, wéi en haut besteet en matière de TVA, dass deen an eenzelne Fäll kann zu relativ dramatesche Situatiounen féieren, wou een dann net méi eigentlech do erauskënnt, opgrond vun aktuellen Texten, an duerfir d'accord waren, wéi d'Médiateure et och proposéiert huet, fir e Relevé des déchéances och hei bei där TVA-Regelung anzeféieren.

Dat gesot, wäert d'LSAP-Fraktioun deen heiten Text stëmmen.

► **Plusieurs voix.** - Très bien!

► **M. le Président.** - Merci dem Här Bodry. Nächst ageschriwwen Riednerin ass d'Madame Viviane Loschetter vun deene Gréngen.

► **Mme Viviane Loschetter (déi gréng).** - Merci, Här President. Dir Dammen an Dir Hären, fir d'Éischt emol Merci un de Rapporteur fir säi schréfftlechen a mündlechen Rapport. Et ass haut scho ganz vill gesot ginn. Duerfir wäert ech net nach eng kéier alles widerhuelen. Doriwwer eraus ass dat heiten e Projet de loi, wou net nëmmen haut scho vill doriwwer geschwat ginn ass, mä ech denken, et war kaum an deene leschte Joren e Projet de loi, bei der Ëmsetzung vun enger Direktiv, wou schonn esou vill diskutéiert ginn ass, wéi bei dësem, dee mer haut stëmmen. An duerfir erlaabt just e puer kleng kéng oder pertinent oder vläicht souguer kritesch Remarqué vun onser Säit zu där ganzer Situatioun, déi mer och elo verloossen.

Éischstens: Mir hunn zolidd Recetté gemaach déi lescht Jore mat deem heite Phenomeen. Mir wëllen awer soen, datt et och einfach verdéngten, eigentlech keng erschaffte Sue waren. Si waren einfach do a si si spéitstens Enn 2018 allegueren net méi do. An dat si ronn eng Milliard Euro, dat sinn ongeféier 7% vum Budget. Dat ass net näischt. An dat wäerte mer och ganz zolidd spieren, an et wäert och net einfach ginn, déi ze kompenséieren.

Zweete Punkt: Dës elo gläich al TVA-Regel, vun där mir zu Lëtzebuerg ebe profitéiert hunn, ass keng Steiernisch gewiescht, déi Lëtzebuerg sech iergendwéi erschlaach hätt, mä et ass eigentlech d'Resultat vun enger awer dach net allze gloriäicher Steuerkonkurrenz, wou nach ëmmer ee Land probéiert, dat anert auszustechen, notament och an der EU. A vläicht gouf et och deemools esou geregelt, well déi grouss Länner vläicht gehofft haten, dovunner ze profitéieren.

Mir Gréng waren nach ëmmer éischter skeptesch zu esou Regelungen a sinn der Meinung, datt esou ee System vu Steuerkonkurrenz an der EU muss a Fro gestallt ginn. De Gros vun de State kënnen duerch esou Steuerkonkurrenzen



nëmmen derbäi verléieren, ergo virun allem och hir Bierger.

Eng kleng Remarque wëll ech nach zum zweete Punkt maachen. Et muss ee jo och soen, d'TVA ass jo eng Form vu Steier, déi de Konsument bezilt an déi de Betrib duerchrecht un de Stat. Et ass also och keng richtigeg Betrëbsbesteuerung.

An obwuel mir sécherlech vill Suen aus deem elektronischen Handel akasséiert hunn, esou sinn et dach awer oft genau déi Betriber aus dem elektronischen Handel gewiescht, déi séier wéineg Betrëbsbesteuerung bezuelen, well si et fäerdegbréngen, iwwer verschidde Weeër, op legalem Wee - ech ënnersträichen, op legalem!; awer vläicht net ëmmer grad etesch korrekt Manéier -, hir Steierlaascht op e Maximum ze reduzéieren. Wa mer also wëllten esou eng Form vu Steierdumping tëschent de Länner en Enn setzen, da kéint dat hei elo e gudden Usaz sinn.

Drëtte Punkt: Et ass zënter 2008, a wa mer ganz éierlech sinn, ass et jo schonn zënter 2006 gewosst, datt dës Recetten à terme wieren. Et ass du schonns gewosst gewiescht, datt mer am Joer 2015/2016 70% vun deem Akommes wäerte verléieren, an dann 2017, Enn 2018 zu 85% dovunner verléieren. An duerno ass alles fort. 2015 gëtt also e schwieregt Joer fir ons all.

D'Recettë sinn all déi Joren net am Budget neutraliséiert ginn. Et ass och keen Zukunftsfong geschaf ginn. Et ass souguer net am Budget selwer u kloer Dépense gekoppelt ginn, déi an der Zäit begrenzt gi wieren. An duerfir fannen ech et awer, an ech muss dat och am Numm vun der grénger Fraktioun soen, e bëssen einfach, fir stolz hei opzetrieden an ze soen, an duerfir hate mer den 31.12.2013 keen Defizit. Ech muss lech soen, Här Roth, déi do Regierung, déi huet elo déi fénnef Joer déi Charge, fir genau deen dote Mësser erëm an de Grëff ze kréien.

Véierten a leschte Punkt: Mir erkenne souwuel dem Finanzministère wéi och der Steierverwaltung hire groussen Asaz un, fir deen „mini one-stop shop“ esou attraktiv wéi méiglech ze maachen an esou vill wéi méiglech dës grouss elektronesch Handelsrisen zu Lëtzebuerg ze halen. Dat ass sécherlech keng einfach Missioun. A mir wëssen och net, ob dat hinnen och nach esou wäert geléngen. Op alle Fall wënsche mir hinnen eng glécklech Hand dobäi a mir wäerte selbstverständlech dës Projet matstëmmen.

► **Plusieurs voix.** - Très bien!

► **M. le Président.** - Merci der Madame Loschetter. Den nächste Riedner ass den Här Gast Gibéryen vun der ADR.

► **M. Gast Gibéryen (ADR).** - Merci, Här President. Ech wëll och vun eiser Säit aus dem Kolleeg Guy Arendt Merci soe fir säi schrëftlechen a mündleche Rapport iwwert dës Projet, wat eng Transpositioun ass vun enger Direktiv aus dem Joer 2008 iwwer eng Annerung vun de Bestëmmungen am Zesammenhang vun der TVA, méi bekannt ënnert dem Begrëff „E-Commerce“.

Et ass dëst e wichtege Projet, wéi d'Madame Loschetter elo scho grad gesot huet, wou mer am Fong schonn iwwer Méint a Joren driwwer diskutéieren, och iwwert d'Konsequenze vun där Direktiv, wat d'Lëtzebuurger Statsfinanze betrëfft, diskutéieren. An haut soll dann eben elo dës Projet oder dës Direktiv ëmgesat ginn.

Mir befannen eis hei an europäeschem Recht, mir befannen eis an de Steierfroen, an do ass laut den europäesche Verträge d'Estëmmegkeet verlaangt zu Bréssel am ECOFIN, fir datt esou eng Direktiv kann ëmgesat ginn.

Lëtzebuerg huet och vu sengem Vetorecht an dësem Dossier ëmmer Gebrauch gemaach, an zwar bis zum 4. Januar 2008, wou den deemolege Stats- a Finanzminister, den Här Jean-Claude Juncker, a Begleedung vum Wirtschaftsminister, dem Här Jeannot Krecké, noginn huet.

Dräi Wochen do virdrun, den 12. an den 13. November 2007, huet d'Lëtzebuurger Regierung nach am ECOFIN nee gesot zu där Direktiv, an ech zitieren, wat den Här Juncker, wéi gesot, den 12. an 13. November 2007 am ECOFIN gesot huet: «Aucun ministre des finances ne renoncerait à 1% de son PIB pour faire plaisir aux autres», a déclaré Jean-Claude Juncker lors de la réunion du Conseil. «Le Luxembourg s'oppose à cette réforme parce que les recettes de TVA liées aux activités dans ce secteur nous rapportent l'équivalent d'1% de son PIB.»

Dat, wéi gesot, war den 13. November am ECOFIN. An dräi Wochen duerno huet den Här

Juncker am Numm vun der Lëtzebuurger Regierung zougestëmmt. En huet zougestëmmt, fir datt déi Direktiv, obschonn näscht geännert huet, obschonn nach ëmmer deen 1% vum PIB, haut sinn et der méi, obschonn deen nach ëmmer verloschteg war fir eis Economie, an en huet gesot, well mer e Kompromëss fonnt hunn, eng Iwwergangsregelung iwwer véier Joer, wou mer net esou haart getraff ginn, wéi dat an Aussicht gestallt ginn ass.

Mä wann een dee Kompromëss kuckt, dann ass dat e ganz bëllege Kompromëss fir déi aner Länner, awer en deiere Kompromëss fir Lëtzebuerg. Well wann déi Direktiv elo a Kraaft trëtt den 1. Januar, da verléiere mer direkt vum éischte Joer un op d'mannst 70% scho vun deem E-Commerce, dee mer erakritt hunn, an iwwert déi véier Joer duerno geet dat op 15 respektiv op 0% erof.

Et ass hei virdru scho genannt ginn, ech wëll déi Chifferen nach eng kéier duerfir soen, déi eis vun der Direktioun vum Enregistrement am Kader vun de Budgetsdebatte virgeluecht gi sinn: 2015 verléiere mer 627 Milliounen, 2016 737, 2017 geet et iwwer eng Milliard an 2018 geet et op 1,2 Milliarden. Dann ass alles fort.

Mir müssen also wëssen, wa mer dee Projet haut hei stëmmen - Här President, d'ADR wäert en net stëmmen -, wa mer dës Projet stëmmen, ass dat deen deierste Projet, deen dëst Parlament jeemools gestëmmt huet.

► **Une voix.** - Très bien!

► **M. Gast Gibéryen (ADR).** - Dee Projet hei kascht de Lëtzebuurger Budget all Joers, net nëmmen eng kéier, mä all Joers eng Milliard an der Zukunft. Et ass also deen deierste Projet, dee mir mat Ofstand jeemools hei am Parlament gestëmmt hunn, well de Verloscht vun de Steieren op iwwer eng Milliard am Joer 2018 eropgeet an all Joers duerno erëmkënn.

An dann diskutéiere mir hei net, ob eis Regierung do wierklech hir Roll gespillt huet deemools zu Bréssel an ob se do wierklech d'Interesse vu Lëtzebuerg vertritt huet, oder ob net vläicht Leit, déi gären an Europa gutt Posten haten a gutt Poste wëlle kréien, ech schwätzen hei vum Här Juncker, ob dat doten net vläicht de Präis ass fir dat. Wann een an Europa wëllt Mister Euro sinn, wann ee wëllt Kommissiouns-president ginn oder vum Conseil President ginn, dat gëtt een doudsécher net an Europa, wann een d'national Interesse virun déi europäesch Interesse setzt.

Déi lescht Regierung huet déi europäesch Interesse virun déi national Interesse gesat, an duerfir kritt en dann och vläicht als Merci e Posten elo an der Europäescher Kommissioun als President.

Et huet nach ni e Land missen esou vill bezuelen, fir datt ee vun hire Leit e wichtege Posten zu Bréssel kritt huet, wéi dat hei d'Lëtzebuurger Land muss maachen. Dat hei kascht, de Poste vum Här Juncker zu Bréssel, dat kascht de Lëtzebuurger Steierzueler an deenen nächste Jore Joer fir Joer eng Milliard, déi elo d'Leit musse bréngen, sief et iwwert d'TVA-Erhéijung, sief et iwwer sozialen Ofbau, sief et beim Kannergeld, bei de Pensiounen, bei de Chèque-servicen oder egal wou. Alles dat kënnt op eis elo zou, well mer déi eng Milliard pro Joer verléieren.

An do kënne mer eisem Ex-Premier, dem Här Juncker, villmools Merci soen, datt hien dat hei fir dëst Land gemaach huet an datt d'Lëtzebuurger Regierung net higaangen ass a se hätt vun hirem Vetorecht... - well dat hei war keng Steiernisch, hei ass kee Schwarzgeld an näscht gemaach ginn.

Hei war einfach en europäesch Recht, wat mer applizéiert hunn a wat gang und gäbe och nach an deenen aneren Domänen vun der TVA applizéiert gëtt. Et si jo elo just den E-Commerce an déi, wat dorunner hänkt, déi mer elo an der TVA-Bestëmmung ëmdréien. Mä all de Rescht bleift nach alles ënnert der aler Règlementatioun bestoen. Et ass just an deem Domän, wou mir als Lëtzebuurger Geld verdéngt hunn, wou elo déi europäesch Direktiv, op Drock vun deene grouss Länner, huet misse geännert ginn a wou d'Lëtzebuurger Regierung da kapituléiert huet an net vun hirem Vetorecht Gebrauch gemaach hat, wou se hätt kënnen, da wier déi Direktiv hei ni zustane komm.

Duerfir muss ee wëssen, wann een haut dës Direktiv zoustëmmt, da muss ee wëssen, datt do dermat dem Lëtzebuurger Stat iwwer eng Milliard d'Joer verluer geet, an et muss een och wëssen, datt dat d'Lëtzebuurger Bierger Joer fir Joer an der Zukunft musse bezuelen.

Mä et muss ee sech och d'Fro stellen: Wat huet nach eng national Souveränitéit fir e Recht? Wann e Statsminister, e Finanzminister zu Bréssel enger Direktiv zoustëmmt, an da gëtt gesot: Elo kritt Der déi Direktiv an elo muss Der déi ëmsetzen!, wat fir eng Roll spillt d'Parlament dann nach hei?

► **Une voix.** - Très bien!

► **M. Gast Gibéryen (ADR).** - Firwat? Well mer mengen, dat wier net richtig, dat werft eis Statsfinanze wierklech op d'Kopp. Ma da kommt, mer stëmme se net! Mir loosse et drop ukommen. Mir soen, mir sinn e souveränt Land, mir sinn e souveränt Parlament, an och, wann de Statsminister elo zougestëmmt huet, mir stëmmen déi Direktiv net!

Ech weess, datt een Obligatiounen huet, datt ee se da muss stëmmen.

► **M. le Président.** - Här Gibéryen, erlaabt Der, dass den Här Roth...?

► **M. Gast Gibéryen (ADR).** - Ech géif gär meng zéng Minutte fäerdeg maachen, well déi leschte kéier hunn ech och Froen zougelooss, herno hunn ech zéng Sekonnen duerfir bäikritt. Den Här Roth ka jo, en huet nach Zäit Rescht, e ka jo nach herno eropkommen.

Op jidde Fall, hei soe mir ganz kloer, an ech si jo net eleng, oder mir als ADR si jo net eleng, déi géint déi Direktiv hei stëmmen. Déi eminent Politikerin vun der CSV, déi net méi op d'Europalëscht komm ass, d'Madame Lulling, déi huet am Europaparlament géint déi Direktiv hei gestëmmt.

► **Une voix.** - Bravo!

► **M. Gast Gibéryen (ADR).** - A se huet geschriwwen - se huet hiren Nee schrëftlech motivéiert; dat kann een am Europaparlament maachen -: «La prise en compte du lieu de consommation va à l'encontre des principes qui régissaient jusqu'à une date récente le système de TVA applicable au niveau communautaire. Après l'épisode peu glorieux de la directive sur les services, la nouvelle remise en cause du principe du pays d'origine concernant cette fois la TVA applicable aux prestations de services serait un pas supplémentaire dans la mauvaise direction. J'ai donc voté contre.»

Dat heescht, d'Madame Lulling huet de Courage gehat, fir dergéint ze stëmmen, wou den Här Juncker zougestëmmt huet. An duerfir ass d'Madame Lulling och vläicht net op der Lëscht vun der CSV fir d'Europawahlen an den Här Juncker ass Spëtzekandidat fir de Poste vun der EU.

(Brouhaha)

Dat heescht also, een, deen d'national Interesse vertritt, dee gëtt écartéiert, an deen d'Lëtzebuurger Interessen zugonschte vun europäeschen Interessen, vun Interesse vun anere grouss State vertritt, dee gëtt gelueft.

Mir wëllen also domadder ganz kloer soen, datt mir als ADR dës Direktiv net wäerten zoustëmmen. Mir gi prinzipiell keng Souveränitéitsrechter of. Hei hate mer d'Recht, fir e Vetorecht ze gebrauchen. Déi lescht Regierung huet hei net déi national Interesse verdeedegt, mä fir en héijere perséinlechen Interessi huet se dëst akzeptéiert.

► **Plusieurs voix.** - Très bien!

► **M. le Président.** - Den Här Wiseler weinst...

► **M. Claude Wiseler (CSV).** - Ech wëll just an engem Saz awer eng Remarque drop maachen iwwert déi inakzeptabel a populistisch Aart a Weis, wéi hei ugefaange gëtt Propaganda ze maachen iwwer e Sujet.

(Interruptions et hilarité)

Den Här Juncker huet, an dat hu mer oft hei am Parlament diskutéiert, deen do Dossier op eng Aart a Weis traitéiert, déi am beschte fir d'Land war. An duerfir wëll ech net an d'Detailer agoen. Mä ech fannen dat do einfach an dës Zäit extrem populistesch, wéi hei geschwat gëtt, Här Gibéryen.

► **M. le Président.** - Ech hu mer erlaabt, dem Här Wiseler d'Wuert ze ginn, well deejéinegen, deen en cause war, net präsent war, fir kënnen de Fait personnel ze invoquéieren.

(Hilarité)

An engem Saz huet den Här Wiseler dat gemaach. D'CSV hat iwwregens nach Riedezäit. Ech géif elo d'Wuert un deen nächste Riedner weiderginn, den Här Justin Turpel.

► **M. Justin Turpel (déi Lénk).** - Merci, Här President. An deem Dossier hei geet et eigentlech ëm zwou Saachen. Et geet ëm de Fong an et geet ëm d'Konsequenzen.

Wat de Fong ugeet, mengen ech, ass et richtig, datt eng Konsumentesteier do erhuewe gëtt, wou konsuméiert gëtt. Dat nämlecht misst eigentlech och geschéie bei den direkte Steieren, déi do missten erhuewe ginn, wou de Mehrwäert produzéiert gëtt. Mä hei ass emol ee Schrack, an ech hoffen, datt deen aneren och eng kéier kënn.

D'Konsequenz dovunner ass awer déi, déi hei elo des Laangen an des Breede beschriwwen ginn ass, nämlech déi vum Ausfall vun de Recetten. An ech soe ganz kloer, de Stat brauch

déi Recetten. De Stat, fir seng Aufgaben ze erfüllen vun öffentlecher Déngschtleeschung, vun Infrastrukturen a vu sozialem Ausgläich, brauch déi Suen, fir kënnen ze fonctionnéieren, an am Intérêt och vun deene Leit, déi net esou vill hunn a sech net alles selwer kënnen leeschten, ze fonctionnéieren.

A wann hei gesot ginn ass vun engem vun de Virriedner, d'Regierung hätt kee Plang B gehat, esou ass dat wahrscheinlech och richtig. Et ass sécher och richtig. Mä de Plang A vun där neier Regierung, deen huet awer wäitgehend an déif Konsequenze fir d'Leit, déi zu Lëtzebuerg wunnen, an net déi, déi am Ausland konsuméieren. Wa mer déi 1,1 Milliarde géifen ausgläichen duerch d'TVA-Erhéijung, wat d'Regierung net wëllt, da misst all Stot zu Lëtzebuerg all Joers 5.500 Euro méi bezuelen.

Wann och nëmmen, an dat ass jo éischer schonn dat, wat d'Regierung wëll esou huet, 700.000 Euro géife missen ausgeglaach ginn, kompenséiert ginn, da kascht dat all Stot zu Lëtzebuerg all Joers an der Moyenne 3.500 Euro.

An dat, wat mech besonnesch schockéiert huet an där Diskussioun, wéi mer hei beim Budget driwwer geschwat hunn, och bei der Lag vun der Natioun, ass dat, datt de Premier gesot huet, en Ausgläich fir Familljen, déi Schwierigkeiten hätte mat wéinegem Akommes, kéim net a Fro. Ech fannen dat d'autant méi schockant, wou hei geschwat gëtt iwwert déi, déi elo scho Schwierigkeiten hunn, fir um Enn vum Mount d'Enne beieneen ze kréien, an ech fannen et gradesou schockant, datt LSAP a Gréng bis elo net dorobber reagéiert hunn.

Well de President mech awer gefrot huet, fir meng Interventioun an zwee ze deelen, well de Finanzminister wierklech muss säi Fliger huelen, wat ech och respektéieren, wëll ech just elo op d'Motioun agoen, op déi aner Froen dann duerno zrëckkommen, esou wéi ech dat proposéiert kritt hunn.

An eiser Motioun steet dran, datt d'Konsequenze vun der TVA-Erhéijung net kënnen net kompenséiert ginn, an ech mengen an ech hoffen, datt mir eis heibannen eens sinn, datt mindestens partiellement oder zu engem gréisseren Deel müssen nei Recettë gesicht gi fir de Stat.

Mir invitéieren awer d'Regierung, fir zesumme mat de Sozialpartner no Alternativen ze sichen zu enger Erhéijung vun der TVA, a mir hätte gären, datt, egal wéi d'Léisung ausgesäit, se sozial gerecht soll gestalt ginn.

Ech géif dann opgrond vun der Proposition vum President, nodeem datt de Minister konnt Positioun huelen, duerno op déi aner Aspekter zrëckkommen.

Motion 1

Vu les pertes pour l'État luxembourgeois résultant des conséquences de la transposition en droit luxembourgeois de l'article 5 de la directive 2008/8/CE du Conseil du 12 février 2008 concernant la T.V.A.;

vu la nécessité de compenser celles-ci, au moins partiellement, par d'autres recettes au bénéfice de l'État à partir du 1.1.2015;

la Chambre des Députés

invite le Gouvernement

à se concerter avec les partenaires sociaux sur des solutions alternatives à une augmentation des taux de la T.V.A.;

à assurer le caractère socialement juste de toute alternative.

(s.) Justin Turpel, Serge Urbany.

► **M. le Président.** - Merci dem Här Turpel. An ech ginn dann direkt d'Wuert dem Finanzminister, fir op d'Debatt ze äntwerten an et nach fäerdegzebréngen, fir de Fliger en vol ze kréien.

Prise de position du Gouvernement

► **M. Pierre Gramegna, Ministre des Finances.** - Merci, Här President. Merci, Dir Damen an Dir Hären Deputéierten, dass mir den Débat ganz e bësse konnten accélérieren; ech muss effektiv a véierzeg Minutten e Fliger fir London huelen.

Ech soen lech alleguerte Merci fir den Débat, an ech soen dem Guy Arendt fir d'Éischt gär Merci als Rapporteur fir déi Aarbechten, déi hie sech gemaach huet, an och fir säi Rapport haut hei.

Ech wëll dee Sujet hei guer net polemesch ugoen. De Sujet ass grav a schlëmm genuch a wäert eis alleguerten déi nächst Jore beschäftegen. Wéi richtig gesot ginn ass: Déi Pertë vun der TVA, déi sinn durabel, déi kréie mir net erëm, an déi Sue si fort. Mir müssen ëmdenken. Dat ass eng Nisch, déi verschwénnt, an dat kascht ganz vill Geld.

Mir wëssen, dass de Minimum, dee mir verléieren 2015, wäert ëm 600 Milliounen leien, mä



dat ass net ganz sécher, well et hântk jo dovunner of, ob déi puer grouss Firmaen heibleiwen an der Période transitoire, a mir wëssen, dass mir zum Schluss 1,1 Milliarde wäerte verléieren. Also egal wéi et geet, d'Perte wäert considéabel sinn.

Ech wollt just der Chamber hei soen, dass ech déi lescht Méint vill Kontakt hat mat deene Firmaen, fir se ze berouegen, fir alles ze maachen, fir dass se solle wéinstens an der Période transitoire heibleiwen. Ech war och duerfir am Mäerz zum Deel verschiddener vun deenen Entrepreneuren a Kalifornien besichen, an, loosse mer soen, ech sinn net ze vill pessimistes, dass e gudde Deel vun deene wäert bleiwen, mä ob si déi ganzen Zäit bleiwen, wësse mer net.

Ech géif och gären ënnersträichen, dass dat heiten effektiv den Élément déclencheur ass, firwat mer müssen e Budget de nouvelle génération maachen, well d'Enjeuen, déi mir hei hunn, esou grouss sinn, an et geet net duer mat spueren; et geet net duer mat traditionelle Mesuren. Et muss een eben de Budget nei oprullen an et ass och duerfir, dass d'Regierung dat wëllt maachen.

Mir hunn als gréisst Mesure bei der Recettësäit ugemellt, dass mir jo géifen d'TVA erhéien, an de Rescht oder de Gros vum Rescht gëtt mat enger Reduktioun vun Dépense gemaach.

Ee Wuert awer dann zu der Augmentation de TVA vun 2%. Dat gëtt jo gemaach op allen Tauxen, mat Ausnahm vum Taux super-réduit, dee bei 3% bleift. Ech hu festgestallt, dass déi gréissten Oppositionspartei dat jo och begréisst, well se dat och selwer virgeschloen hat, déi Augmentation de TVA. An ech fannen et och gutt, dass d'CSV deen heite Projet de loi wäert matstëmmen.

Ech wëll elo net an d'Detailer goe vun der Problematik vun deene verschiddenen Aspekter vun der Augmentation de TVA, ënner anerem deen iwwert de Logement locatif, well mir kréie Geleeënheet, wann d'Gesetz bis déposiert gëtt, fir do d'Argumenter allegueren ze échangieren.

Ech sinn och gefrot ginn, wéi vill dass dat géif abréngen, déi zweet Residenz, wann déi net méi dem Taux vun 3% ënnerluecht wier. Dat hântk ganz vum Perimeter of, deen ee sech do gëtt. Wann een zum Beispill sozial Wunnengen an aner Wunnengen eraushëlt, da changéiert déi Ziffer. Le moment venu, wa mer de Gesetzestext wäerten déposieren, da wäerte mer natierlech de Chiffre maachen.

Et sinn och Froe gestallt ginn iwwert d'Reforme fiscale, déi wéi gesot jo eréischt an e puer Joer wäert kommen. Mir fänken elo eréischt un, drop ze schaffen. Dat Eenzezt, wat ech lech elo ka soen, wat d'Reforme fiscale ubelaangt, dat ass, dass et eng breet gëtt, dass se équilibréiert wäert sinn, dass se wäert Solidaritéssënn hunn an dass se dann eben net nëmmen op verschidde Mesurë ka gekuckt ginn. Dat gëtt och e globale Paquet.

Dat wär, wat ech wëilt zum Projet soen, zum éischte Volet.

Zum zweete Volet, deem vun dem Délai vun dräi Méint fir d'Bezuelen oder fir d'Contestéiere vun der TVA. Ech mengen, do hu mir och e gewëssene Konsensus, dass mir do net sollen e Recours gracieux erlaben, well d'TVA eng aner Steuer ass wéi d'direkt Steuern. An duerfir hu mir jo als Kompromëss proposiert, dass nëmmen an Härtefäll deen Délai kéint verlängert ginn. Dat schéngt mir eng équilibréiert Solutioun.

Als Konklusioun zu dësem Débat wëll ech soen, dass et e bëssen e Lancement ass vun der ganzer Iwwerleeung vun der Augmentation vun der TVA, déi an e puer Woche wäert hei déposiert ginn, an do wäerte mir d'Geleeënheet kréien, fir all d'Argumenter ze échangieren.

Ech soen lech alleguerte Merci.

► **Plusieurs voix.** - Très bien!

► **M. le Président.** - Merci dem Här Pierre Gramegna. Ech ginn dovun aus, dass hien och zu der Motioun Stellung geholl huet. Ech géif dann d'Chamber bidden ëm Versteedsdemech, wann de Finanzminister eis verléisst, mä ech géif den Här Turpel bidden, dann den zweeten Deel vu senger Interventioun virzedroen.

Jo?

► **M. Pierre Gramegna, Ministre des Finances.** - Entschëllegt. Wann Dir wëllt, Här President, kann ech e Wuert zur Motioun soen.

► **M. le Président.** - Wann Der esou léif wëllt sinn.

Motion 1

► **M. Pierre Gramegna, Ministre des Finances.** - Entschëllegt, ech hat mat der Madame Maggy Nagel uitgemaach, dass si et kéint soen, mä ech kann dat awer och elo schonn am Virus soen, dat ass vläicht méi korrekt par rapport zum Här Turpel.

► **M. le Président.** - Dat mengen ech och.

► **M. Pierre Gramegna, Ministre des Finances.** - Et ass an der Rei, da maachen ech dat vun hei aus. Ech huelen d'Proposition zur Kenntnis, mä an den Ae vun der Regierung gëtt et keng Alternativ zur Erhéijung vun der TVA. De Problem läit grad an der TVA. Et ass do, wou mir d'Perte hunn, a mir kompenséieren doduerch, dass mer d'Augmentation de TVA ëm 2 % maachen, kompenséiere mir et nëmmen zu engem Drëttel oder zu engem Véirel. Also, dat ass, mengen ech, nach ganz räsonabel. A mir versichen, de Rescht jo iwwer Réductions de dépenses ze maachen, gréisstendeels. Duerfir gesinn ech keng Alternativ.

Wat de Punkt ubelaangt vun der Concertatioun mat de Partenaires sociaux, do sinn ech ganz d'accord, dass dat soll gemaach ginn, an d'Partenaires sociaux, dat huet d'Regierung an de Premierminister och gesot, wäerte consultéiert ginn an deem ganzen Exercice, dee mir amgaang sinn, an der Regierung ze maachen, wou mir jo e ganze Paquet wäerte schnüren, deen op de Budget de nouvelle génération débouchéiert. Dat wäert am Summer geschéien an do wäerten d'Partenaires sociaux consultéiert ginn.

An där Hisiicht kann ech den honorabelen Deputéierte rassurieren, dass do Concertatioun wäert sinn. Voilà.

► **M. le Président.** - Merci dem Här Finanzminister, an den Här Turpel huet d'Wuert.

► **M. Justin Turpel (déi Lénk).** - Merci. Do, wou ech virdrun opgehalen hunn, dat war, fir kloerzestellen, wat dat, wat d'Regierung wëlls huet mat der TVA-Erhéijung, ob dat elo ee Véirel ass oder een Drëttel vum Ausfall, wat dat all Familljen zu Lëtzebuerg kascht. Ech hunn lech ausgerechent: Bei 700.000 Euro, déi géife kompenséiert ginn, wieren dat 3.500 Euro, déi all Stot all Joers misst bäileeën.

Wou ech haaptsächlech wollt Wäert drop leeën, dat ass eben dat, fir ze soen, datt et Alternative gëtt! Dat soen net nëmme mir, mä dat soe grad d'Sozialpartner. Grad d'Gewerk-

schaften an hiren Avisen hunn drop higewisen - an ech mengen, datt d'LSAP an déi gréng deem och solle Rechnung droen an hire Stellungnahmen -, hunn drop higewisen, datt et wierklech Alternative gëtt zu enger TVA-Erhéijung, déi eben als Erhéijung vun enger indirekter Steuer déi ongerechtste Steuer ass, déi ee ka maachen.

Ech wëll op zwee Elementer hiweisen. Dat éischt Element, op wat ech wëll hiweisen, ass dat, wat ech lech scho gesot hat bei de Budgetdiskussionen: Zu Lëtzebuerg ass den Undeel vun deene Leit, déi schaffe ginn, vun de Salariéen um geschafene Mehrwäert an der Moyenne zéng bis 15% méi niddreg wéi an deene Länner ronderëm. Eleng dat, wann de Loun zu Lëtzebuerg méi gerecht wier, hätten d'Salariéen doduerjer all Joers véier bis sechs Milliarde méi zur Verfügung a géifen dorobber hir Steiere bezuelen, déi méi héich sinn - an dat ass deen zweete Volet -, wéi d'Steieren um Kapital.

Déi véier bis sechs Milliarden, déi d'Salariéen net kréien, déi bei d'Kapital ginn, déi ginn do relativ niddreg besteiert. An dat ass deen zweeten Aspekt vun Alternativen, dat ass deen, datt d'Steierongerechtgeet tëschen deene Leit, déi schaffe ginn a Steiere bezuelen, an de Kapitalbesëtzer, datt déi konstant zougehall huet. Konstant zougehall huet!

A wann een do nach eppes ännert, dat sinn d'Méiglechkeeten, dat sinn d'Alternativen, op déi d'Gewerkschaften hiweisen, déi sech opdinn zu enger ongerechter Erhéijung vun der indirekter TVA, esou wéi se hei geplangt ass.

Ech wëll elo net weider op aner Punkten agoen. Aus där Ursach misst eigentlech, mat deem Zousaz, deen de Minister gesot huet, misst eigentlech jiddwereen hei kënne fir déi Motioun stëmmen, déi mer virgeluecht hunn.

Ech wëll awer nach op een zweete Punkt agoen. Dat ass dat, wat virdrun hei ugedeit ginn ass iwwer Europa. Ech mengen net, datt et just d'Saach ass vu Posten an Europa, firwat datt et zu Lëtzebuerg de Leit schlecht geet. Ech mengen, et geet de Leit zu Lëtzebuerg grad esou schlecht, wéi a villen anere Länner, an d'Politik, déi zu Lëtzebuerg gemaach gëtt an där Hisiicht, ass déi nämlecht Politik wéi déi, déi an Europa gemaach gëtt. An dat ass eng Politik, déi dee falsche Wee ass.

Dat ass eng Politik, grad déi Politik huet dozou gefouert, datt, net nëmme wat d'Krisenbewältigung ugeet, mä och wat aner Mechanismen ugeet, et zu enger Emverdeelung komm ass a ganz Europa, déi mat sech bruecht huet, an ech mengen, Dir misst d'Chiffere bal kennen, datt déi, déi wierklech Suen hunn, ëmmer méi Sue kréien, an déi, déi manner hunn, ëmmer manner kréien.

Egal ob mer déi iewescht 5% vergläiche mat deenen ënneschte 5% oder ob mer déi iewescht 10% vergläiche mat den ënneschten 10%, déi iewescht 30% mat deenen ënneschten 30%, déi Ennerscheeder si gewuess - ech hunn d'Chifferen och eng Kéier hei gesot gehat -, souguer méi staark gewuess wéi an de Länner ronderëm, mä generell an Europa gewuess.

An dorunner schold, d'Ursach dovunner, d'Ursach dovunner, déi ass faassbar, dat ass de Lobbyismus vu grouss Multien a Finanzgesellschaften, déi an Europa gräift. Dat huet vläicht eppes mat Posten ze dinn, mä dat huet haaptsächlech mat Politik a mat Lobbyismus ze dinn.

Dat huet eppes ze di mat Muecht.

Wien übt d'Muecht an Europa aus? Dat ass, wie bestëmmt, wat an Europa geschitt.

An dorunner ännere mer näischt doduerch, datt mer eis op national Grenzen zrëckzéien an erëm nei Grenzen oprichten. Dorunner ännert sech eppes doduerch, datt mer eng aner europäesch Politik maachen! An net duerch een Zrëckzuch, duerch e Réckzuch op eis eege Grenzen. Duerch eng aner Europapolitik, mat där mer et fäerdegbréngen, eng europäesch Mindestbesteuerung, eng Mindeststeuer an Europa anzeféieren, mat där mer et fäerdegbréngen, d'Benefisser emol korrekt ze eraassen a wie se hält, mat där mer Mindestléin an Europa kënne maachen.

Dat bréinge mer fäerdeg mat méi Matsproocherecht fir d'Bierger, fir d'Zivilgesellschaft, mat méi Matsproocherecht fir d'Europaparlament, mat méi Matsproocherecht fir déi national Parlamenten.

An dat ass eng Aufgab, an domadder halen ech op, déi och op d'national Parlamenten wäert zoukommen, ganz anescht wéi bis elo, déi ganz anescht wéi bis elo muss wouergehall ginn, nämlech am Virfeld vun den europäeschen Diskussiounen matschwätzen, fir der Regierung, ier se op Bréssel geet,...

(Brouhaha et coups de cloche de la présidence)

...der Regierung, ier se op Bréssel geet, mat driwwer ze diskutieren, wat hire Mandat ass, an do op eng demokratesch Aart a Weis eng Décisioun ze huelen. Awer och herno, wa mer consultéiert gi bei der Émsetzung, ech fannen dat eng relativ Katastroph, wéi iwwerflächlech dat an dëser Chamber geschitt.

An ech mengen, déi Chamber hei muss Efforte maachen an nächster Zäit, fir op eng ganz aner Aart a Weis déi europäesch Dossierer ze behandelen. Dat betrëfft d'Chamber en tant que tel, dat betrëfft déi politesch Gruppen an et betrëfft natierlech och d'Ressourcen, déi mer brauchen, fir dat iwwerhaupt kënnen ze maachen. Well ouni uerdentlech Ressourcë wäerte mer dat net fäerdegbréngen. Mä dat ass d'Aufgab, déi op eis zoukënn, an net just, sech an eist Schleeckenhaischen an national Grenzen zrëckzéien.

Ech soen lech Merci.

► **M. le Président.** - Domat wär eis Diskussioun ofgeschloss a mer géifen zum Vote iwwert den...

(Interruption)

Ah, den Här Claude Wiseler freet d'Wuert.

► **M. Claude Wiseler (CSV).** - Jo, ech wollt just awer kuerz motivéieren, firwat mer déi hei Motioun net stëmmen. Aus deem ganz einfache Grond, well et ganz kloer ass, datt déi Augmentatioun vun der TVA vun eiser Partei och virun de Wahlen ugekënnegt ginn ass an datt mer och do hannendrustinn, ausser deem Deel, deen d'Augmentatioun vun der zweeter Wunneng ugeet. Wann natierlech hei gefrot gëtt, datt muss diskutéiert gi mat de Sozialpartner, fënnst dat och eis Zoustëmmung. Mir kënnen awer evidenteweis dës Motioun net stëmmen.

► **M. le Président.** - Den Här Wiseler war senger Zäit virus. Mir wollten elo just iwwert den Ensemble vum Projet ofstëmmen. Et ass awer kee Problem; wat gemaach ass, ass gemaach. Mir géifen also zu der Ofstëmmung

■ L'actualité parlementaire sur www.chd.lu

■ Retrouvez vos députés, tous les textes législatifs et documents parlementaires, les émissions «Chambre aktuell» et les vidéos des séances publiques sur www.chd.lu.

■ La Chambre et les jeunes: si tu as entre 12 et 25 ans, consulte nos pages 'Junior' sur www.chd.lu, avec quiz, information et vidéo.

■ L'actualité parlementaire vous intéresse? Consultez le site de la Chambre www.chd.lu.

■ Comment est créée la loi? Toutes les explications en texte et en images, sur www.chd.lu.

■ De la première assemblée parlementaire de 1841 à la Chambre des Députés d'aujourd'hui: retrouvez l'histoire parlementaire sur les pages «organisation et fonctionnement» de la Chambre des Députés.





iwwert den Ensemble vum Projet de loi 6642 iwwergeen.

Vote sur l'ensemble du projet de loi 6642 et dispense du second vote constitutionnel

D'Ofstëmme fänkt un. D'Procuratiounen. De Vote ass ofgeschloss.

De Projet de loi 6642 ass mat 57 Jo-Stëmmen, bei 3 Nee-Stëmmen ugeholl.

Ont voté oui: Mmes Diane Adehm, Sylvie Andrich-Duval, Nancy Arendt, MM. Emile Eicher, Félix Eischen, Luc Frieden (par Mme Nancy Arendt), Léon Gloden, Jean-Marie Halsdorf, Mmes Martine Hansen, Françoise Hetto-Gaasch (par M. Marcel Oberweis), MM. Jean-Claude Juncker (par M. Félix Eischen), Aly Kaes, Marc Lies, Paul-Henri Meyers, Mme Octavie Modert, MM. Laurent Mosar, Marcel Oberweis, Gilles Roth, Marco Schank, Marc Spautz, Serge Wilmes, Claude Wiseler et Michel Wolter (par Mme Octavie Modert);

MM. Marc Angel, Frank Arndt (par M. Roger Negri), Alex Bodry, Mmes Taina Bofferdin, Tess Burton, M. Yves Cruchten, Mme Claudia Dall'Agnol, MM. Mars Di Bartolomeo, Georges Engel, Franz Fayot, Claude Haagen (par Mme Claudia Dall'Agnol), Mme Cécile Hemmen et M. Roger Negri;

MM. Guy Arendt, André Bauler, Gilles Baum, Mme Simone Beissel, M. Eugène Berger, Mme Anne Brasseur, M. Lex Delles, Mme Joëlle Elvinger, MM. Gusty Graas, Max Hahn, Alexander Krieps, Edy Mertens et Mme Lydie Polfer;

MM. Claude Adam, Henri Kox, Mmes Josée Losché, Viviane Loschetter, M. Roberto Traversini et Mme Christiane Wickler;

MM. Justin Turpel et Serge Urbany.

Ont voté non: MM. Gast Gibéryen, Fernand Kartheiser et Roy Reding.

Ass d'Chamber bereet, d'Dispens vum zweete verfassungsméissege Vote ze ginn?

► **Une voix.** - Neen!

(Assentiment)

► **M. le Président.** - Et ass eng iwwerzeegend Majoritéit,...

(Hilarité)

► **Une voix.** - Iwwerzeegend net!

► **M. le Président.** - ...déi Jo seet.

Mir géifen dann zur Motioun iwwergeen, déi ech als genügend motivéiert ugesinn. D'Regierung huet och Stellung bezunn.

Wëllt nach eng vun de Fraktiounen dat maachen?

(Négation)

Dat ass net de Fall. Da géife mer zum Vote iwwert d'Motioun iwwergeen.

Vote sur la motion 1

De Vote ass ofgeschloss an d'Motioun ass ofgelehnt mat 54 Nee-Stëmmen, géint 5 Jo-Stëmmen.

Ont voté oui: MM. Gast Gibéryen, Fernand Kartheiser et Roy Reding;

MM. Justin Turpel et Serge Urbany.

Ont voté non: Mmes Diane Adehm, Sylvie Andrich-Duval, Nancy Arendt, MM. Emile Eicher, Félix Eischen, Luc Frieden (par M. Marcel Oberweis), Léon Gloden, Jean-Marie Halsdorf, Mmes Martine Hansen, Françoise Hetto-Gaasch (par Mme Nancy Arendt), MM. Jean-Claude Juncker (par M. Laurent Mosar), Aly Kaes, Marc Lies, Paul-Henri Meyers, Mme Octavie Modert, MM. Laurent Mosar, Marcel Oberweis, Gilles Roth, Marco Schank, Marc Spautz, Serge Wilmes et Claude Wiseler;

MM. Marc Angel, Frank Arndt (par M. Alex Bodry), Alex Bodry, Mmes Taina Bofferdin, Tess Burton, M. Yves Cruchten, Mme Claudia Dall'Agnol, MM. Mars Di Bartolomeo, Georges Engel, Franz Fayot, Claude Haagen (par Mme Claudia Dall'Agnol), Mme Cécile Hemmen et M. Roger Negri;

MM. Guy Arendt, André Bauler, Gilles Baum, Mme Simone Beissel, M. Eugène Berger, Mme Anne Brasseur, M. Lex Delles, Mme Joëlle Elvinger, MM. Gusty Graas, Max Hahn, Alexander Krieps, Edy Mertens et Mme Lydie Polfer;

MM. Claude Adam, Henri Kox, Mmes Josée Losché, Viviane Loschetter, M. Roberto Traversini et Mme Christiane Wickler.

Voilà, da géife mer zum nächste Projet oder zum viregte Projet, wéi et besser géif heeschen, iwwergeen. Dat ass de Projet 6643, eng Konventioun iwwer eng géigesäiteg administrativ Hëllef am Fiskalberäich. D'Riedezäit ass nom Basismodell festgeluecht. An den Här Guy

Arendt, den honorabele Rapporteur, huet d'Wuert.

12. 6643 - Projet de loi portant approbation de la Convention concernant l'assistance administrative mutuelle en matière fiscale et de son protocole d'amendement, signés à Paris, le 29 mai 2013 et portant modification de la loi générale des impôts

Rapport de la Commission des Finances et du Budget

► **M. Guy Arendt (DP), rapporteur.** - Merci, Här President. Dir Dammen an Dir Hären, léif Kolleegen, dësse Projet de loi ass de 6. Januar vun dësem Joer vum aktuelle Finanzminister déposéiert ginn. Et geet dobäi ëm d'Approuvéiere vun, éischstens, enger Konventioun iwwert déi géigesäiteg Verwaltungshëllef am Steuerberäich an zweetens vum zousätzlechen Annerungsprotokoll, déi alle béid den 29. Mee 2013 zu Paräis vu Lëtzebuerg ënnerschriwwen goufen an Ännerungen um allgemenge Steiergesetz virgesinn.

D'Beruffskummer huet hiren Avis den 30. Januar 2014 eraginn, an d'Aarbechterkummer de 6. Februar 2014. De 25. März huet de Statsrot sech de Gesetzesprojet ugekuckt a säin Avis dozou ofginn. An den 22. Abrëll huet d'Cofibu sech mam Gesetzestext ausenanergesat an den Avis vum Statsrot diskutéiert. De schréffleche Rapport ass den 29. Abrëll an der Kommissioun ugeholl ginn.

Här President, ech gi kuerz op déi Konventioun an den Annerungsprotokoll an, déi duerch dësse Gesetzesprojet approuvéiert solle ginn. D'Konventioun ass souwuel vum Conseil de l'Europe an der Organisatioun fir déi wirtschaftlech Kooperatioun an Entwécklung - OCDE - ausgeschafft ginn. Et geet heibäi ëm d'Transparenz an ëm den Informatiounsautausch, wat d'Steieren ugeet, mat dem Zil, eng gréisser Zesummenaarbecht tëschent den Autoritéite vun de beträffene Länner ze erméiglechen.

Dës Konventioun setzt e multilaterale Kader, deen et de Länner erlaabt, géint den internationale Steuerbedruch virzegoen, andeems eng ganz Rei vu Froen am Zesummenhang mam Informatiounsautausch am Beräich vun de Steiere festgeluecht ginn. Et handelt sech heibäi ënner anerem ëm d'Zoustellung vun de respektiven Dokumenter an dem Recouvrement vun auslännescher Steierschold. Den Informatiounsautausch ka sech entweder per Ufro oder duerch eng automatesch Prozedur oder op eng spontan Manéier maachen.

Ech wëll elo hei net weider op déi technesch Detailer agoen, mä dës Konventioun ass 1988 fir d'Länner vun dësen zwou Organisatiounen, dem Conseil de l'Europe an der OCDE, opgemaach ginn. 2010 ass se dunn duerch deen ernannten Annerungsprotokoll ofgeännert ginn, an zwar éischstens, fir hire Contenu op eng international unerkannten Norm unzepassen, an zweetens, fir se fir Länner opzemaachen, déi weder an der OCDE nach am Conseil de l'Europe representéiert sinn. Dës adaptéiert Norm ass souwuel vun OCDE-Länner wéi och Net-OCDE-Länner ausgeschafft ginn, déi sech am Kader vum Weltforum zur Transparenz an dem steierlechen Informatiounsautausch gesinn hunn. Si ass soumat international unerkannt a steet och am Artikel 26 vum Modell vun der OCDE-Steier-Konventioun.

Här President, Lëtzebuerg huet dës Konventioun an den Annerungsprotokoll den 29. Mee 2013 zu Paräis ënnerschriwwen. Dës Instrumenter ginn eisem Land ënner anerem d'Méiglechkeet, fir Steieren (Impôts) an Abgaben (Taxen) ausserhalb vun eisem Territoire ze recouvréieren an domadder eis aktuell Kompetenzen ze erweideren.

Da wëll ech och nach kuerz méi speziell op den Artikel 30 vun der Konventioun agoen, well dës fir eist Land vu Wichtegkeet ass. Dësen Artikel erlaabt et de Signatairen, prezis definéiert Reserven ze formuléieren. An dësem Kader entschëtt Lëtzebuerg sech, eng Rei vun Ausnahmen virzugesinn, wat den Informatiounsautausch bei Steieren ugeet. Domadder ass d'Unzuel vun de Steierkategorien, déi duerch dës Konventioun beträff sinn, limitéiert op folgend Steieren: den Impôt sur le revenu des personnes physiques, den Impôt sur le revenu des collectivités, den Impôt sur la fortune an den Impôt commercial communal.

Souwuel d'Handwierkerkummer wéi d'Aarbechterkummer an de Statsrot begreissen dës Gesetzesprojet. Sou wéi dat och am Koalitiounsaccord ze liesen ass, setzt Lëtzebuerg sech fir d'Transparenz a Steierfroen a géint den internationale Steuerbedruch an a schafft dofir mat anere Länner zesummen, sief dat an der EU oder an der OCDE.

Dës Konventioun ass vu ganz ville Länner ënnerschriwwen ginn, ënner anerem vun all de G20-Staten an de BRICS-Länner, déi sech elo ëmmer méi entwéckelen. Dësse Gesetzesprojet verankert eist Land an enger internationaler Communautéit, déi op Transparenz bei Steierfroen setzt.

Här President, ech wëll op dëser Plaz dann nach dem Finanzminister Merci soe fir déi gutt a schnell Zesummenaarbecht mat der Chamber. An dat gesot a mat der Hoffnung, dass d'Chamber dësem Gesetzesprojet hir breet Zoustëmmung ausschwätzt, bréngen ech heimadder och den Accord vun der DP-Fraktioun zu deem virleienden Text.

Ech soe Merci fir d'Nolauschteren.

► **Plusieurs voix.** - Très bien!

► **M. le Président.** - Merci och dem Här Arendt. Éischten ageschriwwene Riedner ass den Här Gilles Roth.

Discussion générale

► **M. Gilles Roth (CSV).** - Merci, Här President. Ganz kuerz, ech wëll dem Guy Arendt Merci soe fir säi schréfflechen a mündleche Rapport. Hien huet ënnerstrach, dass dat hei e wichtige Projet de loi ass fir de Ruff vun eisem Land a besonnesch vun eiser Finanz- a Bankplaz. An ech wëll och soen, dass mir als CSV zu enger propperer Bankplaz Lëtzebuerg stinn an dass fir eis och Steierflucht a Steuerbedruch keng Kavaliérsdelikter sinn.

Wat eigentlech dës Konventioun als Ursprung huet, ass dee faméis G20-Sommet zu London vun 2009, wou eist Land praktesch iwwer Nuecht op eng sougenannten „gro Lëscht“ vun deenen net kooperatiounswëllege Steierparadäiser gesat gouf. An do huet de fréiere Finanzminister zesumme mat de Beamten aus de Ministère gekuckt, fir esou schnell wéi méiglech eng ganz Rei vun Duebelbesteierungsofkommenen ofzeschlëssen, déi och schonn déi heite Kooperatiounsstandarden zur Basis haten.

Kuerz e Wuert zu deem, wat den Inhalt vun dëser Konventioun ass, nämlech, éischstens, kann eng Notifizéierung vun engem Steuerbescheid vun enger Lëtzebuerger Steierverwaltung direkt an engem vun deene 60 Signataireslänner gemaach ginn. Dat ass eng wesentlech administrativ Vereinfachung. Et setzt natierlech viraus, dass déi Länner och akzeptéieren, dass esou eng vereinfacht Notifikatioun gemaach gëtt.

Zweetens spillt dës Konventioun och fir d'Andreiwung vun enger Steierschold. An do wëll ech nach eng Kéier drän ënnersträichen, dass mir et begreissen als CSV, dass och mat dëser Konventioun op engem internationale Plang dee sougenannten „information fishing“ net méiglech ass. Et geet also net, dass einfach eng Steierverwaltung aus engem vun deenen anere Signataireslänner op Lëtzebuerg eng Notifizéierung mécht a seet: Macht Dir eng Saisie toutes banques! Ech mengen, wann eng Steierschold am Ausland ufällt an déi Steierverwaltung aus dem Ausland der Meinung ass, dass zu Lëtzebuerg Sue sinn, déi misste saiséiert ginn, da ka se dat maachen, mä si muss ganz kloer soen, op wat fir enger domat genannter Bank dës Saisie sollt gemaach ginn.

Datselwecht zielt fir den Informatiounsautausch. Dee kann nëmme geschéien no eisen interne Prozeduren, wéi se an engem Gesetz vun 2010 stinn, vun deem dee leider verstuerwenen Här Thiel, de Lucien Thiel, deemools Rapporteur war, wou déi genee Prozedur virgesinn ass, no wat fir enge Kritären eng Steierverwaltung kann Informatiounen bei enger Bank anhuelen. An do ass och fir dee Beträffenen eng Recoursméiglechkeet ginn.

Eng lescht Saach ass déi, dass, och wann dat hei ganz héich Kooperatiounsstandarde sinn, fir d'Lëtzebuerger an déi Leit, déi hei residéieren, selbstverständlech d'Bankgeheimnis wäert bestoe bleiven. Et soll een och dat eng Kéier kloer ënnersträichen, an zu deem sti mir och als CSV, well fir eis d'Bankgeheimnis och en Deel Schutz vun der Privatsphär vun deem Eenzelnen ass.

Eng lescht Remarque ass déi: De Guy Arendt huet preziséiert, dass dës Konventioun sech applizéiert fir Lëtzebuerg mat deene Reserven, déi déi fréier Regierung gemaach huet, mä ech mengen, déi breet gedeelt ginn, nämlech sech ausschliisslech op d'Personebesteuerung, d'Betriebsbesteuerung, d'Gewerbesteuer an d'Vermögenssteuer applizéiert. Net dovunner beträff si wéi gesot d'Grundsteuer a virun allem och d'Ierfschaftssteuer.

Mat deenen Observatiounen ginn ech selbstverständlech d'Zoustëmmung vun der CSV-Fraktioun a soen lech Merci fir d'Nolauschteren.

► **M. le Président.** - Merci och dem Här Roth. Nächste Riedner ass den Här Alex Bodry.

► **M. Alex Bodry (LSAP).** - Jo, Här President, fir och den Accord vun eiser Fraktioun hei eranzebréngen, wat déi heite Konventioun ugeet,

bei där een e bëssen awer, wann een d'Geschicht kuckt vun där Konventioun an d'Assumatioun vu Lëtzebuerg zu där Konventioun, gesäit, dass et ënnert dem Drock vun Evenermenter zu engem lichte Paradigmewissel komm ass an der Lëtzebuerger Politik.

Et ass jo awer frappant, dass d'Grondkonventioun schonn zënter dem 25. Januar 1988 besteet an dass et gedauert huet bis 2013, also genau 25 Joer, bis Lëtzebuerg d'Konventioun selwer an dann och en Amendement, deen 2010 gemaach ginn ass, eigentlech ënnerschriwwen huet. Dat beweist, dass während laange Jorzéngten eigentlech Lëtzebuerg hei wéineg Interessi hat un deenen heite Regeln, och wa mäi Virriedner déi elo als ganz positiv duergestallt huet.

Op jidde Fall muss ee feststellen, dass déi successiv Lëtzebuerger Regierungen, soubal et ëm d'Fro vun enger Kollaboratioun tëschent Steierverwaltunge gaangen ass, egal fir wat fir eng Steieren, eigentlech éischer d'Tendenz haten, fir ewechzekucken, wéi fir déi doten Texter ze ënnerschreien.

Mir wëssen, dass sech do d'Welt an deene leschte Jore geännert huet, dass mer ënnert dem Drock vun all méiglechen internationalen Organismen, GAFI an ähnlechen, eng ganz Rësch vun Efforte gemaach hunn, fir eis konform ze setzen zu ëmmer méi contraignant internationalen Regeln.

An ech mengen eigentlech, dass dat do dee richteg Wee ass, dee mer do ginn, och wa mer als Lëtzebuerger Land deen dote Wee net ganz fräiwëlleg ginn, dat wësse mer allegueren heibäi. Ech mengen, et ass awer richtig, dass mer deen Accord hei esou och guttheeschen an dass mer och déi Reserven do als Lëtzebuerg mat agebaut hunn.

Ënnert deene Virbemerkungen, wéi gesot, den Accord vun der sozialistescher Fraktioun zu deem heite Projet de loi.

► **M. le Président.** - Merci dem Här Bodry. Nächste Riednerin ass d'Madame Viviane Loschetter.

► **Mme Viviane Loschetter (déi gréng).** - Jo, Merci, Här President. Just, fir dem Rapporteur Merci ze soe fir säi schréfflechen a mündleche Rapport an den Accord vun der grénger Fraktioun ze ginn.

► **M. le Président.** - Merci der Madame Loschetter. Dann ass nächste Riedner den Här Justin Turpel.

► **M. Justin Turpel (déi Lénk).** - Merci, Här President. Ech mengen, et ass awer wichtig, drop hinzewiesen, datt dat heiten eng Konventioun ass, déi net nëmme vun der EU, mä och vun der OECD an och vum Conseil de l'Europe gedroe gëtt. Ech mengen, et ass eng Konventioun, déi vun '88 un usteet, wéi den Alex Bodry dat elo richtig gesot huet, an déi wierklech laang gebraucht huet, fir ëmgesat ze ginn. Déi am Fong geholl ee Bäitrag soll sinn zur Transparenz a Steierfroen; dat heescht, ee wesentleche Bäitrag, fir Steierhannerzéiung ze verhënnere.

An do sinn dräi Outilen virgesinn, dräi Moyene virgesinn: Dat eent, dat ass Informatiounsautausch, dat Zweet ass d'Zoustellung vun Dokumenter, prezisen Dokumenter, an dat Drëtt, dat ass d'Anzéie vu Steierscholden. Lëtzebuerg ass elo praktesch op dee leschte Wagon gespronge vum leschten Zuch, fir do nach derbäi ze sinn, zesumme mat enger ganzer Rei anere Länner, a fir domadder am Fong geholl ze éviéieren, datt Lëtzebuerg erëm op déi gro Lëscht kënnt vum Forum mondial, wat d'Transparenz géint Steierhannerzéiung ugeet.

Wat awer wesentlech ass an där Konventioun, déi mer elo hei virleien hunn, haaptsächlech net an der Konventioun, mä am Projet de loi, dee mer hei virleien hunn, dat sinn d'Reserven, déi Lëtzebuerg umellt. Lëtzebuerg seet, si géife keng Hëllef bidden, iwwerhaapt keng Assistenz bei beispillsweis engem ganze Beräich, bei engem ganzen Deel vu Steieren, zum Beispill bei Sozialversécherungen, Successiounen, Donatiounen, Propriétés immobilières, TVA an esou weider an esou fort, déi do opgezielt sinn.

Elo kann ee soen, datt an der EU aner Instrumenter besti fir deen Informatiounsautausch. Awer nëmmen an der EU! Mat der Schwäiz, mat Liechtenstein an esou weider verzichte mer also op eng Assistance en matière de transparence vun de Steieren. Mir verzichten also do, aktiv eis un der Steierhannerzéiung ze bedeelegen (veuillez lire: aktiv eis un der Bekämpfung vun der Steierhannerzéiung ze bedeelegen).

An da gëtt et een zweete Volet, wou iwwerhaapt keng..., pardon, wou et eng ageschränkten Hëllef gëtt, nämlech déi, fir bestëmmten Dokumenter auszeliwweren a Steierscholden anzederweien. Dat ass déi op de Revenuen, op den Impôts sur revenu a Benefiss, „en gain en capital“ an „en actif net“, awer nëmmen, wa se